

485 490



宋史卷四百八十五

元中書右丞相總裁脫脫等修

列傳第二百四十四

外國一

夏國上

昔唐承隋後隋承周齊上邈元魏故西北之疆有漢晉  
正朔所不逮者然亦不過使介之相通貢聘之時至而  
已唐德旣衰荒服不至五季迭興綱紀自紊遠人慕義  
無所適從宋祖受命諸國削平海內清謐於是東若高  
麗渤海雖阻隔遼壤而航海遠來不憚跋涉西若天竺二

于闐回鶻大食高昌龜茲拂林等國雖介遼夏之間筐  
篚亦至屢勤館人党項吐蕃唃廝囉董氊瞎征諸部夏  
國兵力之所必爭者也宋之威德亦暨其地又間獲其  
助焉交趾占城真臘蒲耳大理濱海諸蕃自劉鋹陳洪  
進來歸接踵修貢宋之待遇亦得其道厚其委積而不  
計其貢輸假之榮名而不責以煩縟來則不拒去則不  
追邊圉相接時有侵軼命將致討服則舍之不黷以武  
先王柔遠之制豈復有加於是哉南渡以後朔漠不通  
東南之陬以及西鄙冠蓋猶有至者交人遠假爵命訖  
宋亡而後絕焉女直在宋初屢貢名馬他日疆大脩怨

於遼其索叛臣阿疎責還所掠宋詔猶知以通宋爲重  
及渝海上之盟尋構大難宋遂爲所絀辱豈非自取之  
過乎前宋舊史有女直傳今旣作金史義當削之夏國  
雖徇鄉不常而視金有間故仍舊史所錄存焉  
李彝興夏州人也本姓拓跋氏唐貞觀初有拓跋赤辭  
者歸唐太宗賜姓李置靜邊等州以處之其後析居夏  
州者號平夏部唐末拓跋思恭鎮夏州統銀夏綏宥靜  
五州地討黃巢有功復賜李姓思恭卒弟思諫代爲定  
難軍節度使思諫卒思恭孫彝昌嗣梁開平中彝昌遇  
害將士立其族子蕃部指揮仁福仁福卒子彝興嗣事

具五代史彝興彝超之弟也本名彝殷避宋宣祖諱改  
殷爲興初爲行軍司馬清泰二年彝超卒遂加定難軍  
節度使晉初加同平章事開運初契丹授西南招討使  
漢初加兼侍中周初加中書令顯德初封西平王世宗  
卽位加太保恭帝初加太傅宋初加太尉北漢劉鈞結  
代北諸部來寇麟州彝興遣部將李彝玉會諸鎮兵禦  
之鈞衆遂引去建隆初獻馬三百匹太祖大喜親視攻  
玉爲帶且召使問曰汝帥腹圍幾何使言彝興腰腹甚  
大太祖曰汝帥眞福人也遂遣使以帶賜之乾德五年  
卒太祖廢朝三日贈太師追封夏王子克睿立克

睿初名光睿避太宗諱改光爲克彛與之卒自權知州  
事授檢校太保定難軍節度使開寶九年率兵破北漢  
吳堡砦斬首七百級獲牛羊千計俘砦主侯遇以獻累  
加檢校太尉太平興國三年卒太宗廢朝二日贈侍中  
子繼筠立

繼筠初爲衙內都指揮使檢校工部尙

書克睿卒自權知州事授檢校司徒定難軍節度觀察  
留後太宗征北漢繼筠遣銀州刺史李光遠綏州刺史  
李光憲率蕃漢兵列陣渡河畧太原境以張軍勢太平  
興國五年卒弟繼捧立

繼捧立以太平興國七年

率族人入朝自上世以來未嘗親覲者繼捧至太宗甚

嘉之賜白金千兩帛千匹錢百萬祖母獨孤氏亦獻玉盤一金盤三皆厚賚之繼捧陳其諸父昆弟多相怨願留京師乃遣使夏州護總麻已上親赴闕授繼捧彰德軍節度使并官其昆弟夏州蕃落指揮使克信等十二人有差遂曲赦銀夏管內太宗嘗宴羣臣苑中謂繼捧曰汝在夏州用何道以制諸部對曰羌人鷙悍但羈縻而已非能制也弟權知夏州克文來朝以唐僖宗所賜其祖思恭鐵券及朱書御札來上改博州防禦使初繼捧之入也弟繼遷出奔及是數來爲邊患有言繼遷悉知朝廷事蓋繼捧泄之乃出爲崇信軍節度使克憲爲



道州防禦使克文遣歸博州並選常叅官爲通判以專  
郡政端拱初改感德軍節度使屢發兵討繼遷不克用  
宰相趙普計欲委繼捧以邊事令圖之因召赴闕賜姓  
趙氏更名保忠太宗親書五色金花牋以賜之授夏州  
刺史充定難軍節度使夏銀綏宥靜等州觀察處置押  
蕃落等使賜金器千兩銀器萬兩并賜五州錢帛芻粟  
田園保忠辭日宴于長春殿賜襲衣玉帶銀鞍馬錦綵  
三千匹銀器三千兩又賜錦袍銀帶五百副馬百匹至  
鎮數月上言繼遷悔過歸欵乃授繼遷官然實無降心  
也二年加保忠特進同中書門下平章事淳化初與繼

遷戰于安慶澤繼遷中流矢遁去保忠乞師禦繼遷遣  
商州團練使翟守素率兵援之賜保忠茶百斤上醢十  
石乃獻白鵲名海東青以久罷畋詔慰還之五年繼  
遷攻靈州遣侍衛馬軍都指揮使李繼隆討之保忠先  
挈其母與妻子壁野外乃上言與繼遷解怨獻馬五十  
匹乞罷兵帝覽奏立遣中使督繼隆進軍及兵壓境保  
忠反爲繼遷所圖欲併其衆縛牙校趙光祚襲其營帳  
保忠方寢聞難作單騎走還城爲大校趙光嗣閉於別  
室旦開門迎繼隆乃執保忠送闕下待罪崇政殿庭帝  
詰責數四釋之賜冠帶器幣并賜其母金銀器以撫之

尋責授右千牛衛上將軍封宥罪侯賜第京師保忠狀  
貌雄毅居環列奉朝請常怏怏不自得咸平中丁內艱  
以本官起復遷金吾衛上將軍判岳州移復州景德元  
年病劇上言有子永哥不肖乞配春州帝以其病語乃  
授永州別駕詔監軍察之尋卒贈威塞軍節度使克文  
亦死贈岳州防禦使天禧四年錄其孫從吉爲三班奉  
職  
繼遷繼捧族弟也高祖思忠嘗從兄思恭討黃  
巢拒賊於渭橋表有鐵鶴射之沒羽賊駭之遂先士卒  
戰沒僖宗贈宥州刺史祠于渭陽曾祖仁顏仕唐銀州  
防禦使祖彝景嗣于晉父光儼嗣于周建隆四年繼遷

生于銀州無定河生而有齒開寶七年授定難軍管內  
都知蕃落使繼捧之歸宋時年二十留居銀州及使至  
召總麻親赴闕乃詐言乳母死出葬于郊遂與其黨數  
十人奔入地斤澤澤距夏州東北三百里太平興國八  
年知夏州尹憲與都巡檢曹光實偵知夜襲破之斬首  
五百級焚四百餘帳繼遷與其弟遁免獲其母與妻繼  
遷復連娶豪族轉遷無常漸以疆大而西人以李氏世  
著恩德往往多歸之繼遷因語其豪右曰李氏世有西  
土今一旦絕之爾等不忘李氏能從我興復乎衆曰諾  
遂與弟繼冲破丑重遇貴張浦李大信等起夏州乃詐

降誘殺曹光實于葭蘆川遂襲銀州據之時雍熙二年  
二月也三月破會州焚毀城郭而去三年遼以義成公  
主嫁繼遷冊爲夏國王四年知夏州安守中以三萬衆  
戰與王亭鎮敗績繼遷追至城門而返端拱元年繼捧  
之節制夏臺言能歸欵卽授洛苑使銀州刺史淳化初  
復于繼捧戰于安慶澤不利轉攻夏州繼捧乞師及翟  
守素來及奉表歸欵授銀州觀察賜名保吉子德明管  
內蕃落使行軍司馬淳化四年轉運副使鄭文寶議禁  
鹽池用困繼遷數月邊人四十二族萬餘騎寇環州屠  
小康堡太祖乃遣錢若水弛其禁因撫慰之五年正月

繼遷徙綏州民于平夏部將高文恢等因衆不樂反攻  
敗之繼遷復圍堡砦掠居民焚積聚遂攻靈州詔遣李  
繼隆等進討繼遷夜襲保忠走之獲其輜重以歸七月  
乃獻馬以謝又遣弟廷信獻馬橐駝太宗撫賚甚厚遣  
內侍張崇貴詔諭賜茶藥器幣衣物至道初遣左都押  
衙張浦以橐駝及良馬來獻太宗令衛士翹關超乘引  
疆奪槊於後園俾浦等觀且令兵士皆拓兩石弓帝笑  
問浦曰羌人敢敵否浦曰羌部弓弱矢短但見此長大  
人則已遁矣況敢敵乎繼遷乞禁邊盜掠詔令謹守疆  
場還所盜物遣閣門副使馮訥中使賈繼隆特詔拜繼

遷鄜州節度使不受乃以浦爲鄭州團練留京師繼遷表鄭文寶誘其部長嵬囉嵬悉遂貶文寶藍山令繼遷以千騎攻清遠軍守臣張延擊退之二年春命洛苑使白守榮等護送芻粟四十萬于靈州且令車重先後作三隊丁夫持弓矢自衛士卒布方陣以護之遇敵則戰可以無失復令會州觀察使田紹斌率兵應援而守榮乃併爲一運繼遷邀擊于浦洛河紹斌不救衆潰運餽盡爲繼遷所得太宗聞之怒三年復命李繼隆爲環慶等州都部署會四方館使曹璨自河西至言繼遷衆萬餘圍靈武城中上表告急爲繼遷所得遂頓兵不去時

朝議或云率輕騎三道擣平夏或云暑涉旱海無水泉糧運艱辛不如靜以待之帝不聽九月親部分諸將繼隆出環州丁罕出慶州范廷召出延州王超出夏州張守恩出鄜州五路進討直抵平夏繼隆以環州路迂乃自青岡峽遶靈武徑趨平夏兵行數日與丁罕合又行十餘日無所見乃引還張守恩遇之不戰而遁王超范廷召遇之于烏白池大小數十戰不利諸將失期士卒困乏繼遷復令軍主史不訛駐屯橐駝口以阻歸宋人繼隆遣田敏等擊之咸平春繼遷復表不順真宗乃授夏州刺史定難軍節度夏銀綬宥靜等州觀察處置押



蕃落等使加邑千戶實封二百戶益功臣號乃放張浦  
還復遣押衙劉仁謙表讓恩命詔不允賜仁謙錦袍銀  
帶尋遣弟繼瑗來謝恩授繼瑗亳州防禦使封繼遷母  
衛慕氏衛國太夫人子德明爲定難軍節度行軍司馬  
未幾復抄邊四年麟府副部署曹璨率熟戶兵邀繼遷  
輜重于柳撥川殺獲甚衆九月來攻破定州懷遠縣及  
堡靜永州清遠軍監軍段義叛城遂陷五年三月繼遷  
大集蕃部攻陷靈州以爲西平府六年春遂都于靈州  
詔遣張崇貴王涉議和割河西銀夏等五州與之六月  
復以二萬騎圍麟州詔金明巡檢李繼周擊之圍未解

麟州部署請濟師真宗閱地圖曰麟州依險三面孤絕  
戮力可守但城中乏水可憂耳乃遣兵走援繼遷果據  
水砦薄城已五日知州衛居寶出奇兵突戰繼遷勇士城  
下城上鼓噪矢石如注殺傷萬餘人繼遷乃拔去遂率  
衆攻西蕃取西涼府都首領潘羅支僞降繼遷受之不  
疑羅支遽集六谷蕃部及者龍族合擊之繼遷大敗中  
流矢八月復聚兵浦洛河聲言攻環州詔張凝等分兵  
以待之景德元年正月二日卒年四十二子德明立祥  
符五年德明追上繼遷尊號曰應運法天神智仁聖至  
道廣德孝光皇帝元昊追諡曰神武廟號太祖墓號裕

陵 德明小字阿移母曰順成懿孝皇后野利氏卽  
位于樞前時年二十三邊臣以德明初立乞詔撫之因  
賜詔令審圖去就又詔蕃族萬山萬遇龐羅逝安萬子  
都虞候軍主吳守正馬尾等能率部下歸順者授團練  
使銀萬兩絹萬匹錢五萬緡茶五千斤其有亡命叛去  
者釋罪甄錄旣而康奴馱移等率屬來降德明遣牙將  
王旻奉表歸順賜旻錦袍銀帶遣待禁夏居厚持詔荅  
之因詔河西羌族各守疆場德明連歲表歸順三年復  
遣牙將仁勗奉誓表請藏盟府且言父有遺命帝嘉之  
乃授特進檢校太師兼侍中持節都督夏州諸軍事行

夏州刺史上柱國充定難軍節度夏銀綬宥靜等州管  
內觀察處置押蕃落等使西平王食邑六千戶食實封  
一千戶仍賜推忠保順亮節翊戴功臣遣內侍左右班  
都知張崇貴太常博士趙湘等充旌節官告使賜襲衣  
金帶銀鞍勒馬銀萬兩絹萬匹錢三萬貫茶二萬斤給  
奉如內地因責子弟入質德明謂非先世故事不遣乃  
獻御馬二十五匹散馬七百匹橐駝三百頭謝恩四年  
又獻馬五百匹橐駝三百頭謝給奉廩賜襲衣金帶器  
幣及請使至京市所需物從之五月母罔氏薨除起復  
鎮軍大將軍右金吾衛上將軍員外置同正員餘如故

以殿中丞趙積爲弔贈兼起復官告使德明以樂迎至  
柩前明日釋服涕泣對使者自陳感恩及葬請脩供五  
臺山十寺乃遣閤門祇候袁瑀爲致祭使護送所供物  
至山復獻馬五百匹助脩章穆皇后園陵大中祥符元  
年以天書降加賜守正功臣益食邑一千戶食實封四  
百戶俄境內旱詔榷場勿禁西人市糧以振其乏東封  
又遣使來獻禮成加兼中書令益食邑千戶實封四百  
戶時遼亦遣使冊德明爲大夏國王明年出侵回鶻恒  
星晝見德明懼而還三年境內饑上表求粟百萬朝議  
不知所出時王旦爲相請敕有司具粟百萬于京師詔

其來取德明旣得詔曰朝廷有人遂止大起宮室于鐵  
子山會旱西攻河州甘州宗哥族及秦州緣邊熟戶遂  
出大理河築柵蒼耳平四年祀汾陰進中書令五年聖  
祖降加守太保七年二月謁太清宮遣使來獻方物加  
宣德功臣八年築堡于石州濁輪谷將建權塲詔緣邊  
安撫司止之九年因表邊臣違約招納逃亡云自景德  
中進誓表朝廷亦降詔書應兩地逃民緣邊雜戶不令  
停舍皆俾交還自茲謹守翰垣頗有倫理自向敏中歸  
闕張崇貴云亡後來邊臣罕守舊制各務邀功不虞生  
事遂致綏延等界涇原以來擅舉兵甲入臣境土其有

叛亡部族劫掠主財去者百無十回臣之邊吏亦務蔽  
藏俱失奏論漸棄盟約詔荅已令鄜延涇原環慶麟府  
等路約束邊部毋相攻劫其有隱蔽逃亡獲時勘送本  
國亦宜戒部下毋有藏匿各遵紀律以守封疆五年德  
明追遵繼遷爲太祖應運法天神智仁聖至道廣德光  
孝皇帝廟號武宗七年甘露降國中天禧元年正月加  
守太傅食邑千戶實封四百戶三年春德明丁繼立母  
憂除起復如前制以屯田員外郎上官僖爲弟贈兼起  
復官告使閣門祇候常希古爲致祭使冬郊祀又加崇  
仁功臣四年遼主親將兵五十萬以狩爲言來攻涼州

德明帥衆逆拒敗之五年遼復遣金吾衛上將軍蕭孝誠賚玉冊金印冊爲尚書令大夏國王乾興元年加純誠功臣德明自歸順以來每歲旦聖節冬至皆遣牙校來獻不絕而每加恩賜官告則又以襲衣五金荔支帶金花銀匣副之銀沙羅盆合千兩錦綵千匹金塗銀鞍勒馬一匹副以纓復遣內臣就賜之又遣閤門祇候賜冬服及頒儀天具注曆明年攻麟州柔遠砦巡檢楊承吉與戰不利命曹瑋爲環慶秦州緣邊巡檢安撫使禦備之德明城懷遠鎮爲興州以居仁宗卽位加尚書令德明娶三姓衛慕氏生元昊咩迷氏生成遇訛藏屈懷



氏生成嵬天聖六年德明遣子元昊攻甘州拔之八年  
瓜州王以千騎降于夏火星入南斗九年十月德明卒  
時年五十一追諡曰光聖皇帝廟號太宗墓號嘉陵宋  
贈太師尚書令兼中書令以尚書度支員外郎朱昌符  
爲祭奠使六宅副使內侍省內侍押班馮仁俊副之賻  
絹七百匹布三百匹副以上醞羊米麩將葬賜物稱是  
皇太后所賜亦如之帝與皇太后成服于苑中子曩霄  
立曩霄本名元昊小字嵬理國語謂惜爲嵬富貴  
爲理母曰惠慈敦愛皇后衛慕氏性雄毅多大畧善繪  
畫能剗製物始圓面高準身五尺餘少時好衣長袖緋

衣冠黑冠佩弓矢從衛步卒張青蓋出乘馬以二旗引  
百餘騎自從曉浮圖學通蕃漢文字案上置法律常攜  
野戰歌太乙金鑑訣弱冠獨引兵襲破回鶻夜洛隔可  
汗王奪甘州遂立爲皇太子數諫其父母臣宋父輒戒  
之曰吾久用兵疲矣吾族三十年衣錦綺此宋恩也不  
可負元昊曰衣皮毛事畜牧蕃性所便英雄之生當王  
霸耳何錦綺爲德明卒卽授特進檢校大師兼侍中定  
難軍節度夏銀綏宥靜等州觀察處置押審落使西平  
王以工部郎中楊吉爲旌節官告使禮賓副使朱允中  
副之旣襲封明號令以兵法勒諸部始衣白窄衫氊外

紅裏冠頂後垂紅結綬自號鬼名吾祖凡六日九日則見官屬其官分文武班曰中書曰樞密曰三司曰御史臺曰開封府曰翊衛司曰官計司曰受納司曰農田司曰羣牧司曰飛龍院曰磨勘司曰文思院曰蕃學曰漢學自中書令宰相樞使大夫侍中太尉已下皆分命蕃漢人爲之文資則幘頭鞞笏紫衣緋衣武職則冠金帖起雲鏤冠銀帖間金鏤冠黑漆冠衣紫旋襴金塗銀束帶垂蹠躡佩解結錐短刀弓矢韉馬乘鯢皮鞍垂紅纓打跨鈹拂便服則紫阜地繡盤毬子花旋襴束帶民庶青綠以別貴賤每舉兵必率部長與獵有獲則下馬環

坐飲割鮮而食各問所見擇取其長初宋改元明道元  
昊避父諱稱顯道於國中景祐元年遂攻環慶路殺掠  
居人下詔約束之是歲改年開運踰月或告以石晉敗  
亡年號也乃改廣民元年母衛慕氏死遣使來告哀起  
復鎮軍大將軍左金吾衛上將軍員外置同正員以內  
殿崇班閣門祇候王中庸爲致祭使起居舍人郭勸爲  
弔贈兼起復官告使慶州柔遠砦蕃部巡檢鬼通攻破  
後橋諸堡於是元昊稱兵報仇緣邊都巡檢楊遵柔遠  
砦監押盧訓以兵七百與戰于龍馬嶺敗績環慶路都  
監齊宗矩走馬承受趙德宣寧州都監王文援之次節

義峯伏兵發執宗矩久之始放歸二年加兼中書令遣其令公蘇奴兒將兵二萬五千攻唃廝囉敗死略盡蘇奴兒被執元昊自率衆攻猫牛城一月不下旣而詐約和城開乃大縱殺戮又攻青唐安二宗哥帶星嶺諸城唃廝囉部將安子羅以兵絕歸路元昊晝夜角戰三百餘日子羅敗遂取瓜沙肅三州元昊旣還欲南侵恐唃廝囉制其後復舉兵攻蘭州諸羌侵至馬銜山築城凡川元昊旣悉有夏銀綬宥靜靈鹽會勝甘涼瓜沙肅而洪定威龍皆卽堡鎮號州仍居興州阻河依賀蘭山爲固始大建官以嵬名守全張陟張絳楊廓徐敏宗張文

顯輩主謀議以鍾鼎臣典文書以成逋克成賞都卧都  
如定多多馬實惟吉主兵馬野利仁榮主蕃學置十二  
監軍司委豪右分統其衆自河北至午臘蕩山七萬人  
以備契丹河南洪州白豹安鹽州羅洛天都惟精山等  
五萬人以備環慶鎮戎原州左廂宥州路五萬人以備  
鄜延麟府右廂甘州路三萬人以備西蕃回紇賀蘭駐  
兵五萬靈州五萬人興州興慶府七萬人爲鎮守總五  
十餘萬而苦戰倚山訛山訛者橫山羌平夏兵不及也  
選豪族善弓馬五千人迭直號六班直月給米二石鐵  
騎三千分十部發兵以銀牌召部長面受約束設十六

司于興州以總庶務元昊自制蕃書命野利仁榮演繹之成十二卷字形體方整類八分而書頗重複教國人紀事用蕃書而譯孝經爾雅四言雜字爲蕃語復改元大慶宋寶慶元年表遣使詣五臺山供佛寶欲窺河東道路與諸豪歃血約先攻鄜延欲自靖德塞門砦赤城路三道並入遂築壇受冊卽皇帝位時年三十遣潘七布昌里馬乞點兵集蓬子山自詣西涼府祠神明年遣使上表曰臣祖宗本出帝胄當東晉之末運創後魏之初基遠祖思恭當唐季率兵拯難受封賜姓祖繼遷心知兵要手握乾符大舉義旗悉降諸部臨河五郡不旋

踵而歸沿邊七州悉差肩而克父德明嗣奉世基勉從  
朝命眞王之號夙感于頒宣尺土之封顯蒙於割裂臣  
偶以狂斐制小蕃文字改大漢衣冠衣冠旣就文字旣  
行禮樂旣張器用旣備吐蕃塔塔張掖交河莫不從伏  
稱王則不喜朝帝則是從輻湊屢期山呼齊舉伏願一  
垓之土地建爲萬乘之邦家于時再讓靡遑羣集又迫  
事不得已顯而行之遂以十月十一日郊壇備禮爲世  
祖始文本武興法建禮仁孝皇帝國稱大夏年號天授  
禮法延祚伏望皇帝陛下睿哲成人寬慈及物許以西  
郊之地冊爲南面之君敢竭愚庸常敦歡好魚來鴈往



任傳鄰國之音地久天長永鎮邊方之患至誠瀝懇仰  
俟帝俞謹遣弩涉俄疾你斯悶卧普令濟嵬崖妳奉表  
以聞詔削奪官爵互市揭榜于邊募人能擒元昊若斬  
首獻者卽爲定難軍節度使又遣賀永年齎嫚書納旌  
節及所授敕告置神明匣留歸孃族而去康定元年環  
慶路鈴轄高繼隆知慶州張崇俊攻後橋而柔遠砦主  
武英入自北門拔之未幾夏人攻金明砦執都監李士  
彬父子破安遠塞門永平諸砦圍延州設伏三川口執  
劉平石元孫傅偃劉發石遜等又攻鎮戎軍敗劉繼宗  
李緯兵五千環慶部署任福入白豹城焚其積聚破四

十一族慶歷元年二月攻渭州逼懷遠城韓琦徼巡邊  
至高平盡發鎮戎兵及募勇士得萬人命行營總管任  
福等併擊之都監桑懌爲前鋒鈐轄朱觀都監武英繼  
之福申令持重其夕宿三川夏人已過懷遠東南翌日  
諸軍躡其後西路巡檢常鼎劉肅與夏人對壘于張家  
堡懌以騎兵趣之福分兵夕與懌爲一軍屯好水川川  
與能家川隔在隴山外觀英爲一軍屯籠洛川相離五  
里期以明日會兵不使夏人一騎遁然已陷其伏中矣  
元昊自將精兵十萬營于川口候者言夏人有些數不  
多兵益進詰旦福與懌循好水川西去未至羊牧隆城

五里與夏軍遇懌爲先鋒見道傍置數銀泥合封襲謹  
密中有動躍聲疑莫敢發福至發之乃懸哨家鴿百餘  
自合中起盤飛軍上於是夏兵四合懌先犯中軍繼之  
自辰至午酣戰陣中忽樹鮑老旗長二丈餘懌等莫測  
旣而鮑老揮右則右伏出揮左則左伏出翼而襲之宋  
師大敗懌劉肅及福子懷亮皆戰沒小校劉進勸福自  
拔福不聽力戰死初渭川都監趙津將瓦亭塞騎兵三  
千餘爲諸將後繼是日朱觀武英兵會能家川與夏人  
遇陳合王珪自羊牧隆城以屯兵四千五百人助觀略  
陣陣堅不可動英重傷不能出軍戰自午至申夏軍益

至東陣步兵大潰衆遂奔珪英津及叅軍耿傳隊將李簡都監李禹享劉均皆死於陣觀以千餘人保民垣發矢四射會暮夏軍引去將校士卒死者萬三百人關右震動軍須日廣三司告不足仁宗爲之盱食宋庠請修潼關以備衝突秋夏人轉攻河東及麟府不能下乃引兵攻豐州城孤無援遂據之又破寧遠砦屯要害絕麟府餉道揚偕始請棄河外保合河津帝不許會張亢管勾麟府軍馬事破之于栢子又破之于兔毛川亢築十餘柵河外始固元昊雖數勝然死亡創痍者相半人困於點集財力不給國中爲十不如之謠以怨之元昊乃

歸塞門砦主高延德因乞和知延州范仲淹爲書陳禍  
福以喻之元昊使其親信野利旺榮復書語猶嫚知延  
州龐籍言夏境鼠食稼且旱元昊思納款遂令知保安  
軍劉拯諭旺榮言公方持靈夏兵倘內附當以西平茅  
土分冊之知青澗城种世衡又遣王嵩以棗及畫龜爲  
書置蠟丸中遺旺榮諭以早歸之意欲元昊得之疑旺  
榮旺榮得之笑曰种使君亦長矣何爲此兒戲耶囚嵩  
窖中歲餘知渭州王沿總管葛懷敏使僧法淳持書往  
而旺榮乃出嵩與教練使李文貴至青澗城自言用兵  
以來資用困乏人情便於和籍疑其款吾軍留之數月

三年復大入戰于定州宋師大敗葛懷敏死之直抵渭川大焚掠而去詔籍招納籍遣文貴還月餘元昊使文貴與王嵩以其臣榮旺其弟旺令嵬名環卧譽諍三人書議和然屈疆不肯削僭號且云如日方中止可順天西行安可逆天東下籍以其言未服乃令自請而詔籍復書許之明年遣六宅使伊州刺史賀從勗與文貴俱來猶稱男邦泥定國兀卒上書父大宋皇帝更名曩霄而不稱臣兀卒卽吾祖也如可汗號議者以爲改吾祖爲兀卒特以侮玩朝廷不可許詔遣邵良佐張士元張子奭王正倫更往議且許封冊爲夏國主而元昊亦遣

如定聿捨張延壽楊守素繼來四年始上誓表言兩失和好遂歷七年立誓自今願藏明府其前日所掠將校民戶各不復還自此有邊人逃亡亦毋得襲逐臣近以本國城砦進納朝廷其栲栳鎌刀南安承平故地及他邊境蕃漢所居乞畫中爲界於內聽築城堡凡歲賜銀綺絹茶二十五萬五千乞如常數臣不復以他相干乞頒誓詔蓋欲世世遵守永以爲好倘君親之義不存或臣子之心渝變使宗祀不永子孫罹殃詔荅曰朕臨制四海廓地萬里西夏之土世以爲胙今乃納忠悔咎表於信誓質之日月要之鬼神及諸子孫無有渝變申復

懇至朕甚嘉之俯閱來誓一皆如約十二月遣尙書祠部員外郎張子夔充冊禮使東頭供奉官閣門祇候張士元副之仍賜對衣黃金帶銀鞍勒馬銀二萬兩絹二萬匹茶三萬斤冊以漆書竹簡籍以天下樂錦金塗銀印方二寸一分文曰夏國主印錦綬塗金銀牌緣冊法物皆銀裝金塗覆以紫繡約稱臣奉正朔改所賜敕書爲詔而不名許自置官屬使至京就驛買賣宴坐朶殿使至其國相見用賓客禮置榷塲于保安軍及高平砦第不通青鹽然宋每遣使往館于宥州終不復至興靈而元昊帝其國中自若也是歲遼夾山部落呆兒族八



百戶歸元昊興宗責還元昊不遣遂親將騎兵十萬出金肅城弟天齊王馬步軍大元帥將騎七千出南路韓國王將兵六萬出北路三路濟河長驅興宗入夏境四百里不見敵據得勝寺南壁以待八月五日韓國王自賀蘭北與元昊接戰數勝之遼兵至者日益夏乃請和退十里韓國王不從如是退者三凡百餘里矣每退必赭其地遼馬無所食因許和夏乃遷延以老其師而遼之馬益病因急攻之遂敗復攻南壁興宗大敗入南樞王蕭孝友砮擒其鶻突姑附馬興宗從數騎走元昊縱其去元昊五月五日生國入以其日相慶賀又以四孟

朔爲節凡五娶一曰大遼興平公主二曰宣穆惠文皇后沒藏氏生諒祚三曰憲成皇后野力氏四曰妃沒啜氏五曰索氏元昊以慶歷八年正月殂年四十六在位十七年改元開運一年廣運二年大慶二年天授禮法延祚十一年諡曰武烈皇帝廟號景宗墓號泰陵宋遣開封府判官尚書祠部員外郎曹穎叔爲祭奠使六宅使達州刺史鄧保信爲弔慰使賜絹一千匹布五百端羊百口麩米各百石酒百瓶及葬仍賜絹一千五百匹餘如初賻子諒祚立  
諒祚景宗長子也小字甯令哥國語謂歡嘉爲甯令兩岔河名也母曰宣穆惠文皇

后沒藏氏從元昊出獵至此而生諒祚遂名焉以慶歷七年丁亥二月六日生八年戊子正月方期歲卽位四月遣尚書刑部員外郎任顓克冊禮使供備庫副使宋守約克副使冊諒祚爲夏國主嘉祐元年母沒藏氏薨遣祖儒崑多聿則慶唐及徐舜卿來告哀詔以集賢校理馮浩假尚書刑部郎中直史館爲弔慰使文思副使張惟清假文思使副之乃獻遺留馬馳以謝諒祚幼養于母族訛龐訛龐因專國政初麟州西城枕睥睨曰紅樓下瞰屈野河其外距夏境尚七十里而田腴利厚多入訛龐歲東侵不已至耕獲時輒屯兵河西經略使龐

籍每戒邊將使毋得過屈野河然所距屈野河猶二十里管勾軍馬司賈逵徼循見所侵田稍過督邊吏麟州守王亮懼始以事聞詔以殿直張安世賈恩爲同巡檢經制之訛龐晏然弗革迫之則格鬪緩之則歸耕經略司遣使還所侵田訛龐專爲譟言無歸意嘉祐二年遂團兵宿境上逮三月增至數萬人守將斂兵弗與戰知麟州武戡築堡于河西以爲保障役旣興戡率將吏往按視遇夏人于沙鼠浪戡與管勾郭恩等欲止而走馬承受黃道元以言脅之遂夜進至卧牛峯見烽舉且鼓聲道元猶不信比明至忽里堆與夏人相去纔數十步

遂合戰自旦至食時夏人四面合擊衆大潰散走恩與道元及兵馬監押劉慶等被執安撫司遣李思道孫兆往議壇事而訛龐驚不聽久之太原府代州兵馬鈐轄蘇安靜得夏國呂寧拽浪撩黎來合議乃築堠九更新邊禁要以違約則罷和市自此始定諒祚忌訛龐專或告訛龐將叛諒詐討殺之夷其族已而請去蕃禮從漢儀嘉祐六年上書自言慕中國衣冠明年當以此迎使者詔許之明年又改西壽監軍司爲保泰軍石州監軍司爲靜塞軍韋州監軍司爲祥祐軍左廂監軍司爲神勇軍遣人獻方物稱宣徽南院使詔諭非陪臣所宜稱

戒其僭擬使遵誓詔表求太宗御製草詩隸書石本且  
進馬五十匹求九經唐史冊府元龜及宋正至朝賀儀  
詔賜九經還所獻馬治平初求復權塲不許旣而遣吳  
宗等來賀英宗卽位詔令門見使者不從至順天門且  
欲佩魚及儀物自從引伴高宜禁之不可留止廐置一  
夕絕其供饋宗語不遜宜折之使如故事良久乃聽入  
及賜食殿門又訴於押伴張覲詔命還赴延州與宜辨  
宗度理屈不復置對遂詔諒祚懲約之秋夏人出兵秦  
鳳涇原抄熟戶擾邊塞弓箭手殺掠人畜以萬計程戡  
王素孫長卿諭安諸族首領防誘脇散叛遣文思副使

王無忌齎詔問之諒祚遷延弗受已而因賀正使荔茂先獻表歸罪宋邊吏三年遂大舉攻大順城分兵圍柔遠砦燒屈乞村柵段木嶺州兵熟戶蕃官趙明合擊退之遣西京左藏庫副使何次公詰之三月乃獻方物謝罪賜絹五百匹銀五百兩神宗卽位乃遣內殿崇班魏璨賜以治平三年冬服銀絹供備庫副使高遵裕告哀并以英宗遺留物賜之秋夏國遣使奉慰及進助山陵冬种諤取綏州因發兵夜掩鬼名山帳脇降之諒祚乃詐爲會議誘知保安軍楊定都巡檢侍其臻等殺之邊吏以聞命韓琦知永興軍經略西方諒祚錮送殺定者

六宅使李崇貴右侍禁韓道善及虜去定子仲通十二  
月諒祚殂年二十一在位二十年改元延嗣寧國一年  
天祐垂聖三年福聖承道四年禪都六年拱化五年諡  
曰昭英皇帝廟號毅宗墓號安陵子秉常立

宋史卷四百八十五



宋史卷四百八十六

元中書右丞相總裁脫脫等修

列傳第二百四十五

外國二

夏國下

秉常毅宗之長子母曰恭肅章憲皇后梁氏治平四年冬卽位時年七歲梁太后攝政熙寧元年三月遣新河北轉運使刑部郎中薛宗道等來告哀神宗問殺楊定事宗道言殺人者先已執送之矣乃賜詔慰之并諭令上大首領數人姓名當爵祿之俟崇貴至卽行冊禮及

崇貴至云定奉使諒祚常拜稱臣且許以歸沿邊熟戶  
諒祚遺之寶劍寶鑑及金銀物初定之歸上其劍鑑而  
匿其金銀言諒祚可刺帝喜遂擢知保安既而夏人失  
綏州以爲定賣已故殺之至是事露帝薄崇貴等罪而  
削定官沒其田宅萬計二年二月遣河南監牧使劉航  
等冊秉常爲夏國主三月夏人入秦州陷劉溝堡殺范  
愿旣而進誓表乞班誓詔及請以安遠塞門二砦易綏  
州初朝儀欲官爵夏之首領計分其勢郭逵以爲彼必  
不受詔且彼旣恭順宣布以大信不當誘之以利秉常  
果不奉詔遣都羅重進來言曰上方以孝治天下柰何

反教小國之臣叛其君哉於是前議遂罷乃賜誓詔而  
綏州待得二砦迺還夏主受冊而二砦不歸且欲先得  
綏州遣罔萌訛以誓詔來言及趙尙往交地萌訛對以  
朝廷本欲得二砦地界非所約尙曰若然塞門二墻墟  
耳安用之遂罷詔城綏州八月表請去漢儀復用蕃禮  
從之十月遣使來謝封冊三年五月夏人號十萬築開  
訛堡知慶州李復圭合蕃漢兵纔三千偏遣偏將李信  
劉甫种詠等出戰信等訴以衆寡不敵復圭威以節制  
親畫陣圖方畧授之兵進遂大敗復圭懼欲自解卽執  
信等而取其圖畧命州官李昭用劾以故違節制詠瘐

死獄中斬信甫配流郭貴復出兵邛州堡夜入欄浪市掠老幼數百又襲金湯而夏人已去惟殺其老幼一二百人以功告捷而邊怨大起矣八月夏人遂大舉入環慶攻大順城柔遠砦荔原堡淮安鎮東谷西谷二砦業樂鎮兵多者號二十萬少者不下一二萬屯榆林距慶州四十里游騎至城下九日乃退鈐轄郭慶高敏魏慶宗秦勃等死之四年正月种諤謀取橫山領兵先城囉兀進築永樂川賞逋嶺二砦分遣都監趙璞燕達築撫寧故城及分荒堆三泉吐渾川開光嶺葭蘆川四砦與河東路脩築各相去四十餘里二月夏人來攻順寧砦

復圍撫寧折繼昌高永能等擁兵駐細浮圖去撫寧咫尺囉兀兵勢尚完种諤在綏德節制諸軍聞夏人至茫然失措欲作書召燕達戰怖不能下筆顧轉運判官李南公涕泗不已於是新築諸堡悉陷將士千餘人皆沒初朝議以諤新築囉兀城去綏德百餘里偏梁險狹難於餽餉且城中無井泉遣李評張景憲往視之未至而撫寧陷遂詔棄囉兀城五月燕達以戍卒輜重歸自囉兀爲夏人邀擊達多死亡九月夏遣使入貢且以二砦易綏州乞如舊約詔不允五年正月夏鈐轄結勝爲麟州步將王文郁戰降授供奉官久之謀竄歸事覺詔聽

其去六月夏人還荔原堡逃背熟戶鬼通等七十八人  
閏七月遣部將景思立王存以涇原兵出南路王韶由  
東谷徑趨武勝未至十餘里逢夏人戰遂至其城瞎藥  
棄城夜遁大首領曲撒四王阿南珂出奔乃城武勝十  
二月遣使進馬贖大藏經詔賜之而還其馬八年三月  
夏人以索蕃漢部盜人畜投南界者牒熙河經畧司請  
高太尉赴三岔堡會議牒稱大安二年乃詔鄜延經畧  
司令牒宥州問妄稱年號且牒非其地分邊臣會議皆  
違越生事是必夏主不知請問之夏人進奉山陵後期  
詔令先至永厚陵設祭後至闕奉慰帝謂輔臣曰元昊

昔僭號遣使上表稱臣其辭猶遜朝廷不先詰其所以然而遽絕之縱邊民蕃部討虜故元昊嘗自謂爲諸羌所立不得辭朝廷不得命不得已而變西師亟戰輒敗天下騷然仁宗悔之當元昊僭書來獨諫官吳育謂難以中國叛臣處之或可稍易以名號議者皆以爲不然卒困中原而後歲賜封冊爲夏國主良可惜哉元豐二年六月夏人自滿堂川入大會平殺防田人馬兵官李浦等逼逐出塞九月綏德把截楊永慶聲徼循邊而掩取蕃部首級詐言斬犯邊人詔毀永慶出身文字送西京編管四年四月有李將軍清者本秦人說秉常以河

南地歸宋國母知之遂誅清而奪秉常政鄜延總管种  
諤乃疏秉常遇弑國內亂宜興師問罪此千載一時之  
會帝然之遂遣王中正往鄜延環慶稱詔募禁兵從者  
將之詔熙河李憲等以秉常見囚大舉征夏及詔諭夏  
國鬼名諸部首領能拔身自歸及相率共誅國讐當崇  
其爵賞敢有違拒者誅九族八月中正及諤言涇原環  
慶會兵取靈州復討興州麟府鄜延先會夏州取懷州  
渡會興州憲總七軍及董氊兵三萬至新市城遇夏人  
戰敗之王中正出麟州禡辭自言皇帝親征提兵六萬  
才行數里卽奏已入夏境屯白草平九日不進環慶經



畧使高遵裕將步騎八萬七千涇原總管劉昌祚將卒五萬出慶州諤將鄜延及畿內兵九萬三千出綏德城九月諤圍米脂夏人來救戰于無定川大破之斬首五千級十月遂克米脂降守將令分訛遇進攻石州中正以河東軍度無定河循水北行地皆沙濕士馬多陷沒遂繼諤趨夏川而民皆潰軍無所得遵裕至清遠軍攻靈州夏人決黃河灌營復抄絕餉道士卒凍溺死餘兵纔萬三千人遂歸夏人追戰將官俞平死之中正至宥州奈王井糧盡士卒死亡者已二萬乃引軍還諤兵無食會大雪死遂潰入塞者纔三萬人昌祚遇夏人于磨

臍隘夏之拒者二三萬人昌祚乃分兵渡葫蘆河奪其隘與統軍國母弟梁大王戰遂大破之憲營于天都山下焚夏之南牟內殿并其館庫追襲其統軍仁多陵丁敗之擒百人遂班師涇原總兵侍禁魯福彭孫護餽餉至鳴沙川與夏人三戰敗績初夏人聞宋大舉梁太后問策于廷諸將少者盡請戰一老將獨曰不須拒之但堅壁清野縱其深入聚勁兵于靈夏而遣輕騎抄絕其餽運大兵無食可不戰而困也梁后從之宋師卒無功五年正月遼使涿州遣書云夏國來稱宋兵起無名不測事端神宗報以夏國主受宋封爵昨邊臣言乘常見

爲母黨囚辱比令移問事端其同惡不報繼又引兵數萬侵犯我邊界義當有征今彼以屢遭敗衄故遣使詭情陳露意在間貳想彼必以悉察夏人聞此遂不至五月沈括請城古烏延城以包橫山使夏人不得絕沙漠遂遣侍中徐禧內侍押班李舜舉往議禧復請于銀夏宥之界築永樂城永樂依山無水泉獨種諤極言不可禧率諸將竟城之賜名銀川砦禧等還米脂以兵萬人屬曲珍守之永樂接宥州附橫山夏人必爭之地禧等旣城去九日夏人來攻珍使報禧乃挾李舜舉來援而夏兵至者號三十萬禧登城西望不見其際宋軍始懼

翌日夏兵漸逼禧乃以士萬陣城下坐譙門執黃旗令衆曰視吾旗進止夏人縱鐵騎渡河或曰此號鐵鷄子當其半濟擊之乃可有逞得地則其鋒不可當也禧不聽鐵騎旣濟震盪衝突大兵從之禧師敗績將校寇偉李思古高世才夏儼程博古及使臣十餘輩士卒八百餘人盡沒詔李憲張世矩往援及令括遣人與約退軍當還永樂地夏人進侵及縣門潰歸城者決水砦爲道以登夏人因之奔歸于城者三萬人皆沒夏兵圍之者厚數里遊騎掠米脂將士晝夜血戰城中乏水已數日鑿井不得泉渴死者大半括等援兵及餽運皆爲夏大

兵所隔夏人呼环來講和呂整景思義相繼而行夏人  
髡思義囚之而城圍者已浹旬矣夜半夏兵環城急攻  
城遂陷高永能戰沒禧舜舉運使李稷皆死於亂兵惟  
曲珍王湛李浦呂整裸跣走免蕃部指揮馬貴獨誓死  
持刀殺數十人而沒是役也死者將校數百人士卒役  
夫二十餘萬夏人乃耀兵米脂城下而還宋自熙寧用  
兵以來凡得葭蘆吳保義合米脂浮圖塞門六堡而靈  
州永樂之役官軍熟羌義保死者六十萬人錢粟銀絹  
以萬數者不可勝計帝臨朝痛悼而夏人亦困弊夏西  
南都統昂星嵬名濟迺移書劉昌祚曰中國者禮樂之

所存恩信之所出動止猷爲必適于正若乃聽誣受間  
肆詐窮兵侵人之土疆殘人之黎庶是乖中國之體爲  
外邦之羞昨者朝廷暴興甲兵大窮侵討蓋天子與邊  
臣之議爲夏國方守先誓宜出不虞五路進兵一舉可  
定故去年有靈州之役今秋有永樂之戰然較其勝負  
與前日之議爲何如哉朝廷於夏國非不經營之五路  
進討之策諸邊肆撓之謀皆嘗用之矣知徼幸之無成  
故終於樂天事小之道況夏國提封一萬里帶甲數十  
萬南有于闐作我歡鄰北有大燕爲我強援若乘間伺  
便角力競鬪雖十年豈得休哉卽念天民無辜受此塗

炭之苦國主自見伐之後夙夜思念爲自祖宗之世事  
中國之禮無或虧貢聘不敢怠而邊吏幸功上聰致惑  
祖宗之盟旣阻君臣之分不交存亡之機發不旋踵朝  
廷豈不恤哉至於魯國之憂不在顓臾隋室之變生於  
楊感此皆明公得於胸中不待言而後喻今天下倒垂  
之望正在英才何不進讜言闢邪議使朝廷與夏國歡  
好如初主民重見太平豈獨夏國之幸乃天下之幸也  
昌祚上其書帝喻答之六年二月夏人大舉圍蘭州已  
奪兩關門鈴轄王文郁集死士七百夜縋城而下持短  
兵突營遂拔去五月復來圍九日大戰侍禁韋禁死之

乃解去閏六月遣使謨箇咩迷乞遇來貢表曰夏國累  
得西蕃征王子書稱南朝與夏國交戰歲久生靈荼毒  
欲擬通枉緣夏國先曾請所陵疆土不從以來未便輕  
許西蕃再遣使散入昌郡丹星等到國稱南朝語言計  
會但當遣使齎表自令引赴南朝切念臣自歷世以來  
貢奉朝廷無所虧怠至於近歲尤甚歡和不意儉人誣  
間朝廷特起大兵侵奪疆土城砦因茲構怨歲致交兵  
今乞朝廷示以大義特還所侵倘垂開納別效忠勤乃  
賜詔曰頃以權強敢行廢辱朕用震驚令邊臣往問匿  
而不報王師徂征蓋討有罪今遣使造庭辭禮恭順仍



聞國政悉復故常益用嘉納已戒邊吏毋輒出兵爾亦其守先盟遂詔陝西河東經畧司其新復城砦徼循毋出三二里夏之歲賜如舊七年正月圍蘭州李憲戰却之六月攻德順軍巡檢王友戰死九月圍定西城燒龕谷族帳遂以十月攻至靜邊鈐轄彭孫敗之殺其首領仁多陵丁十二月攻清遠隊將白玉李貴死之八年三月神宗崩賜以遺留物夏人攻葭蘆供奉王英戰死七月遣使丁拏鬼名謨鐸副使呂則陳聿精等來奠慰十月遣芭良鬼名濟賴昇聶張聿正進助山陵禮物夏國主母梁氏薨訃至以朝散郎刑部郎中杜紘充祭奠使

東頭供奉官閣門祇候王有言充弔慰使夏以主母遺留物來進元祐元年二月始遣使入貢五月遣鼎利罔豫章來賀哲宗卽位六月復遣訛囉聿來求所侵蘭州米脂等五砦使未至蘇轍兩疏請因其請地而與之司馬光言此邊鄙安危之機不可不察靈夏之役本由我起新開數砦皆是彼田今旣許其內附豈宜靳而不與彼必曰新天子卽位我卑辭厚禮以事中國庶幾歸我侵疆今猶不許則是恭順無益不若以武力取之小則上書悖慢大則攻陷新城當此之時不得已而與之其爲國家之恥無乃甚於今日乎羣臣猶有見小忘大守

近遺遠惜此無用之地使兵連不解爲國家之憂願決  
聖心爲兆民計時異議者衆唯文彥博與光合遂從之  
秋七月乙丑秉常殂時年三十六在位二十年改元乾  
道二年天賜禮盛國慶五年大安十一年天安禮定一  
年諡曰康靖皇帝廟號惠宗墓號獻陵子乾順立

乾順惠宗之長子也母曰昭簡文穆皇后梁氏生三歲  
卽位元祐元年十月以父殂遣使呂則罔聿謨等來告  
哀詔自元豐四年用兵所得城砦待歸我陷執民當畫  
以給還乃遣金部員外郎穆衍充祭奠使供備庫使張  
楸充弔慰使夏遣使進馬駝來賀龍興節二年正月遣

權樞密院都承旨公事劉奉世爲冊禮使崇儀副使崔象先副之冊乾順爲夏國主仍節度西平王三月夏遣大使映吳嵬名諭密副使廣樂毛示聿等請太皇太后進駝馬以謝奠慰七月夏人攻鎮戎軍諸堡劉昌祚等禦之而退三年三月攻德靖砦諸將米贊郝普戰死詔劉昌祚以涇原萬人駐德順軍熙河五千人駐通遠軍據秦鳳要害以爲掎角夏人遂攻龕谷砦砦兵及東關堡巡檢等戰不利死者幾百人四年二月始遣使謝封冊六月稍歸永樂所獲人遂以葭蘆米脂浮圖安彊四砦與之而畫界未定遣崇儀使董正叟如京使李玩押

賜夏國生日禮物及冬服七月坤成節十二月興龍節  
皆遣使來賀五年六月夏人來言畫疆界者不依綏州  
內十里築堡鋪供耕牧外十里立封堠作空地例以辨  
兩國界詔曰已諭邊臣如約夏之封界當亦體此冬攻  
蘭州之質孤勝如堡旣而遣使來賀正旦六年七月遣  
使來賀坤成節九月圍麟府三日殺掠不計廊延都監  
李儀等盡沒七年屢攻綏德城以重兵壓涇原境留五  
旬大掠築壘于沒烟峽口以自固游師雄請自蘭州李  
諾平東抵通遠定西通渭之間建汝遮納迷結珠龍三  
砦及置護耕七堡以固藩籬穆衍請於質孤勝如二堡

之間城李諾平以控要害議未決秦鳳都監康謂以爲  
夏之所以未臣附而屢肆兵者以我勢分於隄備兵未  
練而賞罰失當耳若擇銳結伍伺彼之動聚則先擊散  
則復襲則彼分而我聚以衆擊寡可得志也詔謂詰闕  
而下其事於諸道八年四月復遣使以蘭州一境易塞  
門二砦詔數其違順不常而却其請紹聖元年二月夏  
進馬助太皇太后山陵復遣使再議易地詔不允三年  
九月大入鄜延西自順寧招安砦東自黑水安定中自  
塞門龍安金明以南二百里間相繼不絕至延州北五  
里十月忽自長城一日馳至金明列營環城國主子母

親督桴鼓縱騎四掠知麟州有備復還金明而後騎之  
精銳者留龍安邊將悉兵掩擊不退金明乃破守兵二  
千八百人惟五人得脫城中糧五萬石草千萬束皆盡  
將官皇城使張俞死之既還留一書置漢人頸上曰貸  
汝命爲我投於經畧使處其言曰夏國昨與朝廷議疆  
場惟有小不同方行理究不意朝廷改悔却於坐團鋪  
處立界本國以恭順之故亦電勉聽從遂於境內立數  
堡以護耕而鄜延出兵悉行平蕩又數數入界殺掠國  
人共憤欲取延州終以恭順止取金明一砦以示兵鋒  
亦不失臣子之節也延師呂惠卿上于樞密院而不以

聞初哲宗聞夏人來寇泰然笑曰五十萬衆深入吾境  
不過十日勝不過一二砦須去已而果破金明引退四  
年正月涇原都鈐轄王文振率諸將破沒煙峽新砦斬  
獲三千餘級二月夏復以七萬衆攻綏德鄜延將兵戰  
退之元符元年十二月涇原折可適掩夏西壽統軍嵬  
名阿理監軍妹勒都逋獲之彗星見乾順赦國中二年  
正月國母梁氏薨遼遣使蕭德崇來爲夏人議和乃復  
書謂若果出至誠深悔謝罪當徐度所宜開以自新之  
路五月夏蘭會正鈐轄革瓦孃以部落來降授內殿崇  
班賜銀絹緡錢各三百七月環州种朴徽赤羊川獲賞



囉訛乞家屬百五十餘口孳畜五千夏人千餘騎來追  
戰却之擒監軍訛勃囉及首領淚丁訛遇詔令赴闕存  
恤訛乞家屬又遣人持其家信號往招之九月夏人來  
告國母哀因上表謝過詔夏主省所上表能抗章引慝  
已諭邊臣我疆彼界毋相侵犯已而夏以二千騎出浮  
圖岔來戰供奉官陳告差使李戡死之閏九月古邈川  
部族叛熙河將王愍率兵掩擊翌日夏人馬數萬圍愍  
等力戰敗之擒其鈐轄嵬名乞遇統制苗履又戰於青  
唐峽夏人敗績十二月遂遣今能嵬名濟等進誓表曰  
臣國久不幸時多遇凶兩經母黨之擅權累爲奸臣之

竊命頻生邊患增怒上心釁端旣深理訴難達幸凶黨  
伏誅稚躬反正遐馳懇奏陳前咎之所歸乞紹先盟果  
淵衷之俯納故班詔而申諭獲貢誓以輸誠謹當飭疆  
吏而永絕爭端戒國人而常遵聖化違約則凶咎再降  
背盟則基緒非延約束事條恭依處分詔報曰爾以凶  
黨造謀數干邊吏而能悔過請命祈紹先盟念彼種人  
均吾赤子措之安靜乃副朕心嘉爾自新俯從厥志爾  
無爽約朕不食言自今已往歲賜仍舊三年正月哲宗  
崩徽宗卽位九月夏遣使來奠慰及賀卽位十月復遣  
使來賀天寧節建中靖國元年乾順始建國學設弟子

員三百立養賢務以廩食之崇寧三年蔡京秉政使熙  
河王厚招夏國卓羅右廂監軍仁多保忠厚云保忠雖  
有歸意而下無附者章數上不聽京愈責厚急乃遣弟  
詣保忠許還爲夏之邏者所獲遂追保忠赴牙帳厚以  
保忠縱不爲所殺亦不能復領軍政使得之一匹夫耳  
何益於事京怒必令金帛招致之夏乃點兵延渭慶三  
路各數千騎出沒聲言假兵于遼矣三年遼以成安公  
主嫁乾順四年詔西邊能招致者毋問首從賞同斬級  
令用京計也陶節夫在延州大加招誘乾順遣使巽請  
皆拒之又令殺其牧放者夏人遂入鎮戎畧數萬口執

知廓州高永年而去又攻湟州自是兵連者三年大觀  
元年始遣人脩貢政和四年冬環州定遠大首領夏人  
李訛哆以書遺其國統軍梁哆陵曰我居漢二十年每  
見春廩旣虛秋庾未積糧草轉輸例給空券方春未秋  
士有饑色若捲甲而趨徑擣定遠唾手可取定遠旣得  
則旁十餘城不攻而下矣我儲穀累歲闕地而藏之所  
在如是大兵之來斗糧無齎可坐而飽也哆陵遂以萬  
人來迎轉運使任諒先知其謀募民盡發窖穀哆陵圍  
定邊失所藏越七日訛哆遂以其部萬餘歸夏乾順築  
臧底河城遂詔河東節度使童貫爲陝西經畧以討之

五年春遣熙河經畧劉法將步騎十五萬出湟州秦鳳  
經畧劉仲武將兵五萬出會州貫以中軍駐蘭州爲兩  
路聲援仲武至清水河築城屯守而還法與夏人右廂  
軍戰於古骨龍大敗之斬首三千級貫奏凱皆遷秩秋  
仲武王厚復合涇原鄜延環慶秦鳳之師攻夏臧底河  
城敗績死者十四五秦鳳第三將全軍萬人皆沒厚懼  
厚賂貫而匿之冬夏人以數萬騎畧蕭關而去六年春  
劉法劉仲武合熙秦之師十萬攻夏仁多泉城三日不  
克援後期不至城中請降法受其降而屠之獲首三千  
級种師道以十萬衆復攻臧底河城克之十一月夏人

大舉攻涇原靖夏城時久無雪夏先使數萬騎繞城踐塵漲天兵對不覩乃潛穿壕爲地道入城中城遂陷復屠之而去宣和元年童貫復逼劉法使取朔方法不得已引兵二萬出至統安城遇夏國主弟察哥郎君率步騎爲三陣以當法前軍而別遣精騎登山出其後大戰移七時前軍楊惟忠敗入中軍後軍焦安節敗入左軍朱定國力戰自朝及暮兵不食而馬亦渴死多法乘夜遁比明走七十里至盍朱峴守兵見追之墜崖折足爲一別瞻軍斬首而去是役死者十萬貫隱其敗而以捷聞察哥見法首惻然語其下曰劉將軍前敗我於古骨

龍仁多泉吾常避其鋒謂天生神將豈料今爲一小卒  
梟首哉其失在恃勝輕出不可不戒遂乘勝圍震武劉  
仲武何瓘等赴之乃解去震武在山峽中熙秦兩路不  
能餉自築三歲間知軍李明孟清皆爲夏人所殺初夏  
人陷法軍圍震武欲拔之察哥曰勿破此城留作南朝  
病塊乃自引去而宣撫司受解圍之賞者數百人實自  
去之也諸路所築城砦皆不毛夏所不爭之地而關輔  
爲之蕭條果如察哥之言十月夏遣使來賀天寧節投  
以誓詔不取貫不能屈但迫館伴強之使持還及邊遂  
棄之而去賈炎得而上之貫始大沮欽宗卽位遣使來

賀正旦先是金人滅遼黏罕遣撒拇使夏國許割天德雲內金肅河清四軍及武州等八館之地約攻麟州以牽河東之勢靖康元年三月夏人遂由金肅河清渡河取天德雲內武州河東八館之地四月陷震威城兵馬監押朱昭死之繼而金貴人兀室以數萬騎陽爲出獵掩至天德逼逐夏人悉奪有其地夏人請和金人執其使歲丁未乾德改元正德時建炎元年也是歲九月金帥兀朮回雲中遣保靜軍節度使楊天吉約侵宋乾順許之十月通問使傅雱見金左監軍希尹于雲中希尹以國書授雱爲夏國請熙寧以來侵地蓋彼旣奪其地



乃責償于宋以報之二年正月以主客員外郎謝亮爲  
陝西撫諭使兼宣諭使從事郎何洋爲太學博士持詔  
書賜乾順亮西入關鄜延經畧使王庶遺亮書曰大夫  
出疆有可以安社稷利國家者專之可也夏國爲患小  
而緩金人爲患大而急方其挫銳熙河奔北鄜延秋稼  
未登兵士困餓閣下苟能仗節督諸路協同義舉雖未  
足盡雪舊耻亦可驅逐渡河全秦奠枕徐圖恢復矣亮  
不能用遂由環慶入西夏慶歷後夏國主嘗以賓禮見  
使者亮至乾順乃倨然見之留居幾月始與約和罷兵  
亮歸而夏之兵已躡其後襲取定邊軍明年亮還行在

二月金帥婁宿連陷長安鳳翔隴右大震夏人謀知關  
陝無備遂檄延安府言大金割鄜延以隸本國須當理  
索敢違拒者發兵誅討之帥臣王庶檄報曰金人初犯  
本朝嘗以金肅河清界爾今誰與守國家以奸臣貪得  
不恤鄰好遂至于此貪利之臣何國無之豈意夏國躬  
蹈覆轍比聞金人欲自涇原徑擣興靈方切寒心不圖  
尙欲乘人之急幕府雖士卒單寡然類皆節制之師左  
支右吾尚堪一戰果能辦此何用多言因遣諜問其用  
事臣李遇夏人竟不出是歲開封尹宗澤奏疏請北伐  
且言乞遣辯士西說夏國東說高麗俾出助兵三年知

樞密院事張浚使川陝謀北伐欲通夏國爲援奏請國書詔從之七月浚西行復以主客員外郎謝亮假太常卿權宣府處置司叅議官再使夏國四年正月浚遣亮往迄不得其要領而還十月環慶路統制慕洵叛降于夏國紹興元年二月同州觀察副使劉惟輔棄德順軍輸款于夏夏人拒不受八月詔以夏本敵國毋復班曆日十一月川陝宣撫副使吳玠始遣人通夏國書二年九月呂頤浩言聞金夏交惡夏國屢遣人來吳玠關師古軍中宜令張浚通問以揮其情是歲餘覩謀結燕雲之人圖女直黏罕覺欲誅之餘覩父子遁入夏國夏人

以其兵少不納四年十二月吳玠奏夏國數通書有不  
忘本朝意五年乾順改元大德七年正月吳璘奏西蕃  
三十八族首領趙繼忠來歸用可扼西夏右臂十月僞  
齊知同州李世輔謀執金帥撒里曷歸宋不克遂奔夏  
世輔父母親族在延安者金人殺之無遺類九年夏人  
陷府州靈芝生於後堂高守忠家乾順作靈芝歌俾中  
書相王仁宗和之乾順以世輔爲靜難軍承宣使鄜延  
岐雍等路經畧安撫使世輔請兵將報延安之役夏主  
俾先討別種酋豪號青面夜叉者世輔擒之以報乾順  
乃爲出兵遣文臣王樞武臣啜訛等隨之世輔軍至延

安撒里曷走耀州世輔購得害其父母者殺之東城聞  
金人降赦歸宋河南地乃說王樞等降宋嚆訛不從世  
輔抽刀斫之不中遂縛樞命王晞韓護送行在五月丙  
午世輔以其衆三千人歸宋授世輔護國承宣使樞密  
行府前軍都統制賜名顯忠六月四日乾順殂年五十  
七在位五十四年改元天儀治平四年天祐民安八年  
永安三年貞觀十三年雍寧五年元德八年正德八年  
大德五年諡曰聖文皇帝廟號崇宗墓號顯陵子仁孝  
嗣 仁孝崇宗長子也紹興九年六月崇宗殂卽位  
時年十六十月詔還王樞及夏國之俘百九十八人十一

月仁孝尊其母曹氏爲國母十二月納后罔氏十年夏  
改元大慶三月詔胡世將與夏人議入貢夏人不報十  
一年六月夏樞密使慕洎弟慕濬謀反伏誅仁孝上尊  
號曰制義去邪十一年九月夏國饑十三年三月地震  
逾月不止地裂泉湧出黑沙歲大饑乃立井里以分振  
之十三年夏改元人慶始建學校于國中立小學于禁  
中親爲訓導十四年彗星見坤宮五十餘日而滅占其  
分在夏國十五年八月夏重大漢太學親釋奠弟子員  
賜予有差十六年尊孔子爲文宣帝十七年改元天盛  
策舉人始立唱名法十八年復建內學選名儒主之增

脩律成賜名鼎新二十八年始立通濟監鑄錢二十九  
年歸宋官李宗閏上書言夏國副使屈移嘗兩使南朝  
以爲衣冠禮樂非他國比怨金人叛盟奪其所與地此  
其情可見壬子歲黏罕嘗聚兵雲中以窺蜀夏人謂將  
圖已舉國屯境上以待其至今誠遣辯士往說之夏國  
必不難出兵庶足爲吾聲援以圖恢復書奏不報三十  
年夏封其相任得敬爲楚王三十一年立翰林學士院  
以焦景顏王僉等爲學士俾脩實錄金主亮犯四川宣  
撫使吳璘檄西夏俾合兵討之三十二年夏國移置中  
書樞密於內門外大禁奢侈始封制蕃字師野利仁榮

爲廣惠王夏人聞金人南侵以騎兵二千至蔡園川及馬家巉秃頭嶺將分道入攻宣撫使吳璘命鎮戎軍守將秦弼說諭之金兵敗夏人乃還乾道三年五月夏國相任得敬遣間使至四川宣撫司約共攻西蕃虞允文報以蠟書七月得敬間使再至宣撫司夏人獲其帛書傳至金人四年夏改元乾祐得敬以謀篡伏誅淳熙十三年二月諜報故遼國大石牙林假道于夏以伐金密詔利西都統制吳挺與制置使留正議之十三年四月復詔挺結夏國當時論議可否及夏人從違史皆失書紹熙四年九月二十日仁孝殂年七十在位五十五年



改元大慶四年人慶五年天盛二十一年乾祐二十四年諡曰聖德皇帝廟號仁宗陵號壽陵子純佑嗣

純佑仁宗長子也母曰章獻欽慈皇后羅氏仁宗殂卽位時年十七明年改元天慶開禧二年正月二十日廢遂殂年三十在位十四年諡曰昭簡皇帝廟號桓宗陵號莊陵鎮夷郡王安全立安全崇宗之孫越王仁友之子開禧二年正月廢其主純佑自立明年改元應天嘉定四年八月五日安全殂年四十二在位六年改元應天四年皇建二年諡曰敬穆皇帝廟號襄宗陵號康陵有子曰承禎齊國忠武王彥宗之子大都督府主遵頊

立 遵頊始以宗室策試進士及第爲大都督府主  
嘉定四年七月三日立時年四十九改元光定金衛紹  
王崇慶元年三月遣使冊爲夏國王七年夏左樞密使  
萬慶義勇遣二僧齋蠟書來西邊欲與共圖金人復侵  
地制置使黃誼不報其後金人南遷議徙都長安遣元  
帥赤盞以重兵宿鞏州夏主畏其侵迫乃遣樞密使都  
招討甯子寧忠翼赴蜀聞議夾攻秦鞏聶子述俾利西  
安撫丁焞答書飭將吏嚴兵以待時嘉定十二年三月  
也子述尋罷去焞持議不可輕動師不可出十二月甯  
子寧遣使復申前說且責我以失期時安丙再開宣闕

許之命利州副都統制程信任其責十三年八月甯子  
寧以師期來告丙遂決意出師以奏劄聞諸朝不待報  
可命將大舉卒無功夏人甯子寧鬼名公輔亦率其衆  
歸國十四年正月丙回利州十六年遵頊自號上皇傳  
位於其子德旺寶慶二年春遵頊殂年六十四改元光  
定十三年諡曰英文皇帝廟號神宗丙戌七月德旺殂  
年四十六改元乾定四年廟號獻宗清平郡王之子南  
平王覲立二年丁亥秋爲大元所取國遂亡

夏之境土方二萬餘里其設官之制多與宋同朝賀之  
儀雜用唐宋而樂之器與曲則唐也河之內外州郡凡

二十有二河南之州九曰靈曰洪曰宥曰銀曰夏曰石  
曰鹽曰南威曰會河西之州九曰興曰定曰懷曰永曰  
涼曰甘曰肅曰瓜曰沙熙秦河外之州四曰西寧曰樂  
曰廓曰積石其地饒五穀尤宜稻麥甘涼之間則以諸  
河爲漑興靈則有古渠曰唐涼曰漢源皆支引黃河故  
灌溉之利歲無旱澇之虞其民一家號一帳男年登十  
五爲丁率二丁取正軍一人每負擔一人爲一抄負擔  
者隨軍雜役也四丁爲兩抄餘號空丁願隸正軍者得  
射他丁爲負擔無則許射正軍之疲弱者爲之故壯者  
皆習戰鬪而得正軍爲多凡正軍給長生馬馳各一團

練使以上帳一弓一箭五百馬一橐駝五旗鼓槍劍棍  
梃抄袋披氈渾脫背索鍬鏹斤斧箭牌鐵瓜箆各一刺  
史以下無帳無旗鼓人各橐駝一箭三百幕梁一兵三  
人同一幕梁幕梁織毛爲幕而以木架有砲手二百人  
號潑喜陡立旋風砲於橐駝鞍縱石如拳得漢人勇者  
爲前軍號撞令郎若脆怯無他伎者遷河外耕作或以  
守肅州有左右廂十二監軍司曰左廂神勇曰石州祥  
祐曰宥州嘉寧曰韋州靜塞曰西壽保泰曰卓囉和南  
曰右廂朝順曰甘州甘肅曰瓜州西平曰黑水鎮燕曰  
白馬強鎮曰黑山威福諸軍兵總計五十餘萬別有擒

生十萬興靈之兵精練者又二萬五千別副以兵七萬  
爲資贍號御圍內六班分三番以宿衛每有事於西則  
自東點集而西於東則自西點集而東中路則東西皆  
集用兵多立虛砦設伏兵包敵以鐵騎爲前軍乘善馬  
重甲刺斫不入用鈎索絞聯雖死馬上不墜遇戰則先  
出鐵騎突陣陣亂則衝擊之步兵挾騎以進戰則大將  
居後或據高險其人能寒暑饑渴出戰率用隻日避晦  
日齋糧不過一旬弓皮弦矢沙柳籜惡雨雪晝舉煙揚  
塵夜篝火以爲候不耻奔遁敗三日輒復至其處提人  
馬射之號曰殺鬼招魂或縛草人埋於地衆射而還篤

信機鬼尚詛祝每出兵則先卜卜有四一以艾灼羊脾  
骨以求兆名炙勃焦二擗竹于地若揲著以求數謂之  
擗算三夜以羊焚香祝之又焚穀火布靜處晨屠羊視  
其腸胃通則兵無阻心有血則不利四以矢擊弓弦審  
其聲知敵至之期與兵交之勝負及六畜之災祥五穀  
之凶稔俗皆土屋惟有命者得以瓦覆之

論曰拓跋氏考諸前史可見也自赤辭納款於貞觀立  
功於天寶思恭以宥州著節於咸通夏雖未稱國而王  
其土久矣子孫歷王五代宋興太祖卽西平王加彝興  
太尉德明在祥符間已追帝其父於國中逮元昊始顯

稱帝厥後因之與金同亡槩其歷世二百五十八年雖  
嘗受封冊于宋宋亦稱有歲幣之賜誓詔之答要皆出  
於一時之言其心未嘗有臣順之實也元昊結髮用兵  
凡二十年無能折其强者乾順建國學設弟子員三百  
立養賢務仁孝增至三千尊孔子爲帝設科取士又置  
官學自爲訓導觀其陳經立紀傳曰不有君子其能國  
乎今史所載追尊諡號廟號陵名兼採夏國樞要等書  
其與舊史有所牴牾則闕疑以俟知者焉

宋史卷四百八十六



宋史卷四百八十七

元中書右丞相總裁脫脫等修

列傳第二百四十六

外國三

高麗

高麗本曰高句驪禹別九州屬冀州之地周爲箕子之國漢之玄菟郡也在遼東蓋扶餘之別種以平壤城爲國邑漢魏以來常通職貢亦屢爲邊寇隋煬帝再舉兵唐太宗親駕伐之皆不克高宗命李勣征之遂拔其城分其地爲郡縣唐末中原多事遂自立君長後唐同光

天成中其主高氏累奉職貢長興中權知國事王建承高氏之位遣使朝貢以建爲立菟州都督充大義軍使封高麗國王晉天福中復來朝貢開運二年建死子武襲位漢乾祐末武死子昭權知國事周廣順元年遣使朝貢以昭爲特進檢校太保使持節立菟州都督大義軍使高麗國王顯德二年又遣使來貢加開府儀同三司檢校太尉又加太師建隆三年十月昭遣其廣評侍郎李興祐副使李勵希判官李彬等來朝貢四年春降制曰古先哲后奄宅中區曷嘗不同文軌於萬方覃聲教於四海顧予涼德猥被鴻名爰致賓王宣優錫命開

府儀同三司檢校太師之菟州都督充大義軍使高麗國王昭日邊鍾粹遼左推雄習箕子之餘風撫朱蒙之舊俗而能占雲候海奉贄充庭言念傾輸實深嘉尚是用賜之懿號醕以公田載推柔遠之恩式獎拱辰之志於戲來朝萬里美愛戴之有孚柔撫四封庶混井之無外永保東裔聿承天休可加食邑七千戶仍賜推誠順化保義功臣其年九月遣使時贊等來貢涉海值大風船破溺死者七十餘人贊僅免詔加勞恤開寶五年遣使以方物來獻制加食邑賜推誠順化守節保義功臣進奉使內議侍郎徐熙加檢校兵部尚書副使內奉卿

崔鄴加檢校司農卿並兼御史大夫判官廣評侍郎康  
禮試少府少監錄事廣評員外郎劉隱加檢校尚書金  
部郎中皆厚禮遣之昭卒其子伯權領國事九年伯遣  
使趙遵禮奉土貢以父沒當承襲來聽朝旨授伯檢校  
太保立菟州都督大義軍使封高麗國王太宗卽位加  
檢校太傅改大義軍爲大順軍遣左司禦副率于延超  
司農寺丞徐昭文使其國伯遣國人金行成入就學於  
國子監太平興國二年遣其子元輔以良馬方物兵器  
來貢其年行成擢進士第三年又遣使貢方物兵器加  
伯檢校太師以太子中允直舍人院張洎著作郎直史

館旬中正爲使四年復遣供奉官閤門祇候王僕使其  
國五年六月再遣使貢方物六年又遣使來貢七年仙  
卒其弟治知國事遣使金全奉金銀線罽錦袍褥金銀  
飾刀劍弓矢名馬香藥來貢且求襲位授治檢校太保  
玄菟州都督充大順軍使封高麗國王以監察御史李  
巨源禮記博士孔維奉使雍熙元年遣使韓遂齡以方  
物來貢二年加治檢校太傅遣翰林侍書王著侍讀呂  
文仲充使三年出師北伐以其國接契丹境常爲所侵  
遣監察御史韓國華賫詔諭之曰朕誕膺丕構奄宅萬  
方華夏蠻貊罔不率俾蠢茲北裔侵敗王畧幽薊之地

中朝土疆晉漢多虞夤緣盜據今國家照臨所及書軌  
大同豈使齊民陷諸獷俗今已董齊師旅殄滅妖氛惟  
王久慕華風素懷明畧效忠純之節撫禮義之邦而接  
彼邊疆罹於蠱毒舒泄積憤其在茲乎可申戒師徒迭  
相掎角協比鄰國同力盪平奮其一鼓之雄戡此垂亡  
之寇良時不再王其圖之應俘獲生口牛羊財物器械  
並給賜本國將士用申賞勸先是契丹伐女真國路由  
高麗之界女真意高麗誘導構禍因貢馬來愬于朝且  
言高麗與契丹結好倚爲勢援剽畧其民不復放還洎  
高麗使韓遂齡入貢太宗因出女真所上告急木契以

示遂齡仍令歸白本國還其所俘之民治聞之憂懼及國華至令人言於國華曰前歲冬末女真馳木契來告稱契丹興兵入其封境恐當道未知宜豫爲之備當道與女真雖爲鄰國而路途遐遠彼之情僞素知之矣貪而多詐未之信也其後又遣人告曰契丹兵騎已濟梅河當道猶疑不實未暇營救俄而契丹雲集大擊女真殺獲甚衆餘族敗散逃遁而契丹壓背追捕及于當道西北德昌德成威化光化之境俘擒而去時有契丹一騎至德米河北大呼關城戍卒而告曰我契丹之騎也女真寇我邊鄙率以爲常今則復仇已畢整兵回矣當

道雖聞師退猶憂不測乃以女真避兵來奔二千餘衆  
資給而歸之女真又勸當道控梅河河津要築治城壘以  
爲防遏之備亦以爲然方令行視興功不意女真潛師  
奄至殺畧吏民驅掠丁壯沒爲奴隸轉徙他方以其歲  
貢中朝不敢發兵報怨豈期反相誣構以惑聖聽當道  
世稟正朔踐修職貢敢有二心交通外國況契丹介居  
遼海之外復有大梅小梅二河之阻女真渤海本無定  
居從何徑路以通往復橫羅讒謗憤氣填膺日月至明  
諒垂昭鑒間者女真逃難之衆罔不存恤亦有授以官  
秩尚在當國其職位高者有勿屈尼于郝元尹能達郝



老正衛迦耶夫等十數人欲望召赴京闕與當道入貢之使庭辯其事則丹石之誠庶幾昭雪國華諾之乃命發兵西會治遷延未卽奉詔國華屢督之得報發兵而還具錄女真之事以奏焉十月遣使朝貢又遣本國學生崔罕王彬詣國子監肄業端拱元年加治檢校太尉以考功員外郎兼侍御史知雜呂端起居舍人呂祐之爲使二年遣使來貢詔其使選官侍郎韓藺卿副使兵官郎中魏德柔並授金紫光祿大夫判官少府丞李光授檢校水部員外郎先是治遣僧如可賫表來覲請大藏經至是賜之仍賜如可紫衣令同歸本國淳化元年

三月詔加治食邑千戶遣戶部郎中柴成務兵部員外郎直史館趙化成往使其國俗信陰陽鬼神之事頗多拘忌每朝廷使至必擇良月吉辰方具禮受詔成務在館踰月乃遺書於治曰王奕葉藩輔尊獎王室凡行大慶首被徽章今國家特馳信使以申殊寵非止歷川塗之綿邈亦復蹈溟海之艱危皇朝睠遇斯亦隆矣而乃牽於禁忌泥於卜數眩惑日者之浮說稽緩天子之命書惟典冊之垂文非卜祝之能曉是以書稱上日不推六甲之元辰禮載仲冬但取一陽之嘉會粲然古訓足以明稽所宜改圖速拜君賜儻鳳縟無滯克彰拱極之

誠則龍節有輝免貽辱命之責謹以誠告王其聽之治  
覽書慚懼遣人致謝焉會霖雨不止仍以俟霽爲請成  
務復遺書以責之治翌日乃出拜命二年遣使韓彥恭  
來貢彥恭表述治意求印佛經詔以藏經并御製祕藏  
銓逍遙詠蓮華心輪賜之四年正月治遣使白思柔貢  
方物并謝賜經及御製二月遣祕書丞直史館陳靖祕  
書丞劉式爲使加治檢校太師仍降詔存問軍吏耆老  
靖等自東牟趣八角海口得思柔所乘海船及高麗水  
工卽登舟自芝岡島順風泛大海再宿抵甕津口登陸  
行百六十里抵高麗之境曰海州又百里至閻州又四

十里至白州又四十里至其國治迎使于郊盡藩臣禮  
延留靖等七十餘日而還遺以襲衣金帶金銀器數百  
兩布三萬餘端附表稱謝先是三年上親試諸道貢舉  
人詔賜高麗賓貢進士王彬崔罕等及第既授以官遣  
還本國至是靖等使回治上表謝曰學生王彬崔罕等  
入朝習業蒙恩並賜及第授將仕郎守祕書省校書郎  
仍放歸本國竊以當道荐修貢奉多歷歲年蓋以上國  
天高遐荒海隔不獲躬趨金闕面叩玉階唯深拱極之  
誠莫展來庭之禮彬罕等幼從匏繫嗟混迹於嶠夷不  
憚蓬飄早賓王於天邑緼袍裋褐玉粒桂薪堪憂食貧

若爲卒歲皇帝陛下天慈照毓海量優容豐其館穀之  
資勗以藝文之業去歲高懸軒鑑大選魯儒彬罕接武  
澤宮敢萌心於中鵠濫巾英域空有志於羨魚陛下以  
其萬里辭家十年觀國俾登名於桂籍仍命秩於芸臺  
憫其懷土之心慰以倚門之望別垂宸旨令歸故鄉玄  
造曲成鴻恩莫報臣不勝感天戴聖之至又有張仁銓  
者進奉使白思柔之孔目吏也上書獻便宜思柔意其  
持國陰事以告仁銓懼不敢歸上命靖等領以還國仍  
詔治釋仁銓罪治又上表謝曰官告國信使陳靖劉式  
至奉傳聖旨以當道進奉使從行孔目官張仁銓至闕

輒進便宜翻懷憂懼今附使臣帶歸本國者仁銓峒宅  
細民海門賤吏獲趨上國敢貢愚誠罔思狂瞽之尤輒  
奏權宜之事妄塵旒冕上黷朝廷今者仰奉綸言釋其  
罪罟小人趨利豈虞僭越之求聖主寬恩遠降哀矜之  
命其張仁銓者已依詔旨放罪令掌事如故又上言願  
賜板本九經書用敦儒教許之先是式等復命治遣使  
元證衍送之證衍至安香浦口值風損船溺所賫物詔  
登州給證衍文據遣還仍賜治衣段二百疋銀器二百  
兩羊五十口五年六月遣使元郁來乞師愬以契丹寇  
境朝廷以北鄙甫寧不可輕動干戈爲國生事但賜詔

慰撫厚禮其使遣還自是受制于契丹朝貢中絕治卒  
弟誦立嘗遣兵校徐遠來候朝廷德音遠久不至咸平  
三年其臣吏部侍郎趙之遴命牙將朱仁紹至登州偵  
之州將以聞上特召見仁紹因自陳國人思慕皇化爲  
契丹羈制之狀乃賜誦鈿函詔一道令仁紹賫還六年  
誦遣使戶部郎中李宣古來朝謝恩且言晉割燕薊以  
屬契丹遂有路趣玄菟屢來攻伐求取不已乞王師屯  
境上爲之牽制詔書優荅之誦卒弟詢權知國事先是  
契丹旣襲高麗遂築六城曰興州曰鐵州曰通州曰龍  
州曰龜州曰郭州于境上契丹以爲貳已遣使來求六

城詢不許遂舉兵奄至城下焚蕩宮室剽劫居人詢徙居昇羅州以避之兵退乃遣使請和契丹堅以六城爲辭自是調兵守六城大中祥符三年大舉來伐詢與女真設奇邀擊殺契丹殆盡詢又于鴨綠江東築城與來遠城相望跨江爲橋潛兵以固新城七年方遣告奏使御事工部侍郎尹證古以金線織成龍鳳鞍并綉龍鳳鞍幞各二幅細馬二疋散馬二十疋來貢證古還賜詢詔書七通并衣帶銀綵鞍勒馬等八年詔登州置館於海次以待使者其年又遣御事民官侍郎郭元來貢元自言本國城無垣墻府曰開城管六縣民不下三五千



有州軍百餘置十路轉運司統之每州管縣五六小者亦三四每縣戶三四百國境南北千五百里東西二千里軍民雜處隸軍者不黥面方午爲市不用錢第以布米貿易地宜秔稻風俗頗類中國無羊兔橐駝水牛驢氣候少寒暑差多有僧無道士民家器皿悉銅爲之樂有二品曰庫樂曰鄉樂三歲一試舉人有進士諸科算學每試百餘人登第者不過一二十每正月一日五月五日祭祖禰廟又正月七日家爲王母像戴之二月望僧俗燃燈如中國上元節上巳日以青艾染餅爲盤羞之冠端午有鞦韆之戲士女服尚素地產龍鬚席藤席

白唾紙鼠狼尾筆元辭貌恭恪每受宴賜必自爲謝表  
粗有文采朝廷待之亦厚九年辭還賜詢詔書七函襲  
衣金帶器幣鞍馬及經史曆日聖惠方等元又請錄國  
朝登科記及所賜御詩以歸從之天禧元年遣御事刑  
官侍郎徐訥奉表獻方物于崇政殿又賀封建壽春郡  
王三年九月登州言高麗進奉使禮賓卿崔元信至秦  
王水口遭風覆舟漂失貢物詔遣內臣撫之十一月元  
信等入見貢罽錦衣褥烏漆甲金飾長刀匕首罽錦鞍  
馬紵布藥物等又進中布二千端求佛經一藏詔賜經  
還布以元信覆溺匱乏別賜衣服繒綵焉明州登州屢

言高麗海船有風漂至境上者詔令存問給度海糧遣  
還仍爲著例五年詢遣告奏使御事禮部侍郎韓祚等  
一百七十九人來謝恩且言與契丹修好又表乞陰陽

地理書聖惠方並賜之金行成者累官至殿中丞治表  
乞放還行成自以筮仕朝廷不願歸本國又以父母垂  
老在海外旦暮思念恨祿不及令工圖其像置正寢與  
妻史氏居旁室晨夕定省上食未嘗少懈淳化初通判  
安州被病知州李範與僚佐數人省之行成病已篤泣  
且言曰行成外國人爲朝官佐郡政病且死未有以報  
主恩雖瞑目固有遺恨二子宗敏宗訥皆幼家素貧無

他親可依旦暮委溝壑矣未幾行成死其妻養二子誓不嫁織履以給範表其事詔以宗敏補太廟齋郎令安州月給其家錢叁緡米五斛長吏歲時存問又高麗信州永寧人康馘字休祐父允三世爲兵部侍郎馘少好學時紇升與契丹交兵馘從允戰木葉山下連中二矢神色不變後陷契丹遁居墨斗嶺又至黃龍府間道得歸高麗時允猶在開寶中允遣馘隨賓貢肄業國學太平興國五年登進士第解褐大理評事知湘鄉縣再遷著作佐郎知江陰軍江州歷官以清白幹力聞改太常博士蘇易簡在翰林稱其吏才命爲廣南西路轉運副

使賜緋魚就遷正使再轉度支員外郎戶部判官出知  
峽越二州連被詔褒其能政又爲京西轉運使加工部  
郎中賜金紫戩所至好行事上章多建白以竭誠自任  
景德三年卒真宗特以其子希齡爲太常寺奉禮郎給  
奉終喪乾興元年二月祚等辭歸國賜詢如故事會真  
宗宴駕又賚遺物以賜詢天聖八年詢復遣御事民官  
侍郎元頴等二百九十三人奉表入見於長春殿貢金  
器銀罽刀劒鞍勒馬香油人參細布銅器礪黃青鼠皮  
等物明年二月辭歸賜予有差遣使護送至登州其後  
絕不通中國者四十三年詢孫徽嗣立是爲文王熙寧

二年其國禮賓省移牒福建轉運使羅拯云本朝商人  
黃真洪萬來稱運使奉密旨令招接通好奉國王旨意  
形于部述當國僻居陽谷邈戀天朝頃從祖禰以來素  
願梯航相繼葢爾平壤邇于大遼附之則爲睦鄰踈之  
則爲勍敵慮邊騷之弗息蓄陸襲以靡遑久困羈縻難  
圖攜貳故違述職致有積年屢卜雲祥雖美聖辰於中  
國空知日遠如迷舊路於長安運屬垂鴻禮稽展慶大  
朝化覃無外度豁包荒山不謝乎織埃海不辭於支派  
謹當遵尋通道遄赴橐街但茲千里之傳聞恐匪重霄  
之紆眷今以公狀附真萬西遷俟得報音卽備禮朝貢

徽又自言嘗夢至中華作詩紀其事三年拯以聞朝廷  
議者亦謂可結之以謀契丹神宗許焉命拯諭以供擬  
腆厚之意徽遂遣民官侍郎金悌等百十人來詔待之  
如夏國使往時高麗人往反皆自登州七年遣其臣金  
良鑑來言欲遠契丹乞改塗由明州詣闕從之郡縣供  
頓無舊準頗擾民詔立式頒下費悉官給又以其不邇  
華言恐規利者私與交關令所至禁止徽問遺二府甚  
厚詔以付市易務售繖帛答之又表求醫藥畫塑之工  
以教國人詔羅拯募願行者九年復遣崔思訓來命中  
貴人倣都亭西驛例治館待之寢厚其使來者亦益多

嘗獻伶官十餘輩曰夷樂無足觀止欲潤色國史爾帝  
以其國尚文每賜書詔必選詞臣著撰而擇其善者元  
豐元年始遣安燾左諫議大夫陳睦假起居舍人往聘  
造兩艦於明州一曰凌虛安濟致遠次曰靈飛順濟皆  
名爲神舟自定海絕洋而東旣至國人歡呼出迎徽具  
袍笏玉帶拜受詔與燾睦尤禮館之別宮標曰順天館  
言尊順中國如天云徽已病僅能拜命且乞鑿藥二年  
遣王舜封挾鑿往診治徽又使柳洪來謝海中遇風失  
所貢物洪上章自劾敕書安慰尋獻日本所造車曰諸  
侯不貢車服故不敢與土貢同前此貢物至輒下有司



估直償以萬緡至是命勿復估以萬緡爲定數六年徽  
卒在位三十八年治尙仁恕爲東夷良主然猶循其俗  
王女不下嫁臣庶必歸之兄弟宗族貴臣亦然次子運  
諫以爲旣通上國宜以禮革故習徽怒斥之于外訃聞  
天子閔焉詔明州修浮屠供一月遣楊景畧王舜封祭  
奠錢總宋球弔慰景畧辟李之儀書狀帝以之儀文稱  
不著宜得問學博洽器宇整秀者召赴中書試以文乃  
遣又以遠服不責其備諭使者以相見之所殿名鴟吻  
皆聽勿避徽子順王勳嗣百日卒弟宣王運仁賢好文  
內行飭備每賈客市書至則潔服焚香對之八年遣其

弟僧統來朝求問佛法并獻經像哲宗立遣使金上琦  
奉慰林暨致賀請市刑法之書太平御覽開寶通禮文  
苑英華詔惟賜文苑英華一書以名馬錦綺金帛報其  
禮運立四年卒子懷王堯嗣未閱歲以病不能爲國國  
人請其叔父鷄林公熙衛攝政未幾堯卒熙乃立凡數  
歲使不至元祐四年其王子義天使僧壽介至杭州祭  
亡僧言國母使持二金塔爲兩宮壽知州蘇軾奏却之  
語在軾傳熙後避遼主諱改名顒顒性貪吝好奪商賈  
利富室犯法輒久縻責贖雖微罪亦輸銀數斤五年復  
通使賜銀器五千兩七年遣黃宗慤來獻黃帝鍼經請

市書甚衆禮部尚書蘇軾言高麗入貢無絲髮利而有五害今請諸書與收買金箔皆宜勿許詔許買金箔然卒市冊府元龜以歸元符中遣士賓貢徽宗立遣任懿王嘏來弔賀崇寧二年詔戶部侍郎劉達給事中吳玘往使顯卒子俟嗣貢使接踵且令士子金瑞等五人入太學朝廷爲置博士政和中升其使爲國信禮在夏國上與遼人皆隸樞密院改引伴押伴官爲接送館伴賜以大晟燕樂籩豆簠簋尊壘等器至宴使者于睿謨殿中宣和四年俟卒初高麗俗兄終弟及至是諸弟爭立其相李資深立俟子楷來告哀詔給事中路允迪中書

舍人傅墨卿奠慰候之在位也求醫於朝詔使二鑿往  
留二年而歸楷語之曰聞朝廷將用兵伐遼遼兄弟之  
國存之足爲邊扞女真狼虎耳不可交也業已然願二  
鑿歸報天子宜早爲備歸奏其言已無及矣欽宗立賀  
使至明州御史胡舜陟言高麗靡敝國家五十年政和  
以來人使歲至淮浙之間苦之彼昔臣事契丹今必事  
金國安知不窺我虛實以報宜止勿使來乃詔留館於  
明而納其贄幣明年始歸國自王徽以降雖通使不絕  
然受契丹封冊奉其正朔上朝廷及他文書蓋有稱甲  
子者歲貢契丹至於六而誅求不已常云高麗乃我奴

耳南朝何以厚待之使至其國尤倨暴館伴及公卿小  
失意輒行捽筮聞我使至必假他事來覘分取賜物嘗  
詰其西向修貢事高麗表謝其畧曰中國三甲子方得  
一朝大邦一周天每修六貢契丹悟乃得免高宗卽位  
慮金人通於高麗命迪功郎胡蠡假宗正少卿爲高麗  
國使以間之蠡之回史失書二年浙東路馬步軍都總  
管楊應誠上言由高麗至女真路甚徑請身使三韓結  
鷄林以圖迎二聖乃以應誠假刑部尚書充高麗國信  
使浙東帥臣翟汝文奏言應誠欺罔爲身謀耳若高麗  
辭以金人亦請問津以窺吳越其將何辭以對萬一辱

命取笑遠夷願母遣應誠聞之遂與副使韓衍書狀官孟健由杭州浮海以行六月抵高麗諭其王楷以所欲爲楷曰大朝自有山東路盍不由登州往應誠曰以貴國路徑耳楷有難色已而命其門下侍郎傅佾至館中果對如翟汝文言應誠曰女真不善水戰佾曰彼常於海道往來況女真舊臣本國今反臣事之其強弱可見矣居數月復遣其中書侍郎崔洪宰知樞密院金富軾持前議不變謂二聖今在燕雲大朝卽盡納土未必可得何不練兵與戰終不奉詔應誠留兩月餘不得已見楷於壽昌門受其拜表而還十月至闕入對言狀上以

楷負國恩怒甚尚書右丞朱勝非曰彼鄰金人與中國  
隔海利害甚明曩時待之過厚今安能責其報也右僕  
射黃潛善曰以巨艦載精兵數萬徑擣其國彼寧不懼  
勝非曰越海興師燕之事可爲近鑒上怒解十一月  
楷遣其臣尹彥頤奉表謝罪詔以二聖未歸燕設不宜  
用樂乃設幕殿門外命客省官吳得興伴賜酒食命中  
書舍人張澂押伴如禮遣還三年八月上謂輔臣曰聞  
上皇遣內臣宮女各二人隨高麗貢使來朕聞之悲喜  
交集呂頤浩曰此必金人之意不然高麗必不敢安知  
非窺我虛實以報於是詔止之畧曰王緬守基圖夙同

文軌乃附乘桴之信嗣修貢篚之恭惟忠順之無他質  
神明而靡愧屬闕聞聽良用歎嘉言念晚年實爲多故  
舉中原之生聚遭強敵之震驚旣涉境以深深猶稱兵  
而未已茲移仗衛暫駐江湖如行使之果來恐有司之  
不戒俟休邊境當問聘期壞晉館以納車庶無後悔閉  
漢關而謝質非用前規想彼素懷知吾誠意紹興元年  
十月高麗將入貢禮部侍郎柳約言四明殘破之餘荒  
蕪單弱恐起戎心宜屯重兵以俟其至十一月詔柳約  
奉使高麗不果行二年閏四月楷遣其禮部員外郎崔  
惟清閣門祇候沈起入貢金百兩銀千兩綾羅一百疋



人參五百斤惟清所獻亦三之一上御後殿引見賜惟清起金帶二笞以溫詔遣還是月定海縣言民亡入高麗者約八十人願奉表還國詔候到日高麗綱首卓榮等量與推恩十二月聞高麗遣知樞密院事洪彝叙等六十五人來貢議以臨安府學館其使言者謂雖在兵間不可無學恐爲所窺詔以洪惠寺爲同文館以待之旣而卒不至六年高麗持牒官金稚圭至明州賜銀帛遣之懼其爲金間也三十二年三月高麗綱首徐德榮詣明州言本國欲遣賀使守臣韓仲通以聞殿中侍御史吳芾奏曰高麗與金人接壤昔稚圭之來朝廷懼其

爲間亟遣還今兩國交兵德榮之請得無可疑使其果  
來猶恐不測萬一不至貽笑遠方詔止之隆興二年四  
月明州言高麗入貢史不書引見日恐同彛敘之詐其  
後使命遂絕慶元間詔禁商人持銅錢入高麗蓋絕之  
也初高麗入使明越困於供給朝廷館遇燕賚賜予之  
費以鉅萬計饋其主者不在焉我使之行每乘二神舟  
費亦不貲三節官吏糜爵捐廩皆仰縣官昔蘇軾言于  
先朝謂高麗入貢有五害以此也惟是國於吳會事異  
東都昔高麗入使率由登萊山河之限甚遠今直趨四  
明四明距行都限一浙水耳由海道奉使高麗瀾漫汪

洋洲嶼險阻遇黑風舟觸礁輒敗出急水門至羣山島始謂平達非數日不至也舟南北行遇順風則歷險如夷至不數日其國東西二千里南北五百里西北接契丹恃鴨綠江以爲固江廣三百步其東所臨海水清澈下視十丈東南望明州水皆碧玉居開州蜀莫郡曰開成府依大山置宮室立城壁名其山曰神嵩民居皆茅茨大止兩椽覆以瓦者才十二以新羅爲東州樂浪府號東京百濟爲金州金馬郡號南京平壤爲鎮州號西京西京最盛總之凡三京四府八牧郡百有十八縣鎮三百九十洲島三千七百郡邑之小者或只百家男

女二百十萬口兵民僧各居其一地寒多山土宜松栢  
有秔黍麻麥而無秫以秔爲酒少絲蠶匹縑直銀十兩  
多衣麻紵王出乘車駕牛歷山險乃騎紫衣行前捧護  
國仁王經以導出令曰教曰宣臣民呼之曰聖上私謂  
曰嚴公后妃曰宮主百官名稱階勳功臣檢校頗與中  
朝相類過御史臺則下馬違者有劾士人以族望相高  
柳崔金李四姓爲貴種無宦者以世族子爲內侍六衛  
歲十二月朔王坐紫門小殿注官外官則付國相有國  
子監四門學學者六千人貢士三等王城曰土貢郡邑  
曰鄉貢他國人曰賓貢間歲試于所屬再試于學所取

不過三四十人然後王親試以詩賦論三題謂之簾前  
重試亦有制科宏詞之目然特文具而已士尚聲律少  
通經王城有華人數百多閩人因賈舶至者密試其所  
能誘以祿仕或強留之終身朝廷使至有陳牒來訴者  
則取以歸百官以米爲奉皆給田納祿半給死乃拘之  
國無私田民計口授業十六以上則充軍六軍三衛常  
留官府三歲以選戍西北半歲而更有警則執兵任事  
則服勞事已復歸農畝王亦有分地以供私用王母妃  
主世子皆受湯沐田上下以賈販利入爲事日中爲虛  
用米布貿易地產銅不知鑄錢中國所予錢藏之府庫

時出傳翫而已崇寧後始學鼓鑄有海東通寶重寶三韓通寶三種錢然其俗不便也兵器疎簡無強弩大刀崇尚釋教雖王子弟亦常一人爲僧信鬼拘陰陽病不相視歛不撫棺貧者死則露置中野歲以建子月祭天國東有穴號歲神常以十月望日迎祭謂之八關齋禮儀甚盛王與妃嬪登樓大張樂宴飲賈人曳羅爲幕至百疋相聯以示富三歲大祭祠遍其封內因是歛民財而王與諸臣分取之祖廟在國門之外大祭則具車服冕圭親祠王城有佛寺七十區而無道觀大觀中朝廷遣道士往乃立福源院置羽流十餘輩俗不知鑿自王

俟來請醫後始有道其術者人首無枕骨背扁側男子  
巾幘如唐裝婦人鬢髻垂右肩餘髮被下約以絳羅貫  
之簪旋裙重疊以多爲勝男女自爲夫婦者不禁夏月  
同川而浴婦人僧尼皆男子拜樂聲甚下無金石之音  
旣賜樂乃分爲左右二部左曰唐樂中國之音也右曰  
鄉樂其故習也堂上設席升必脫屣見尊者則膝行必  
跪應必唯其拜無不答子拜父猶半答其禮性仁柔惡  
殺不屠宰欲食羊豕則包以蒿而燔之刑無慘酷之科  
唯惡逆及罵父母者斬餘皆杖肋外郡刑殺悉送王城  
歲以八月減囚死罪貸流諸島累赦眠輕重原之自明

州定海遇便風三日入洋又五日抵墨山入其境自墨  
山過島嶼詰曲礁石間舟行甚駛七日至禮成江江居  
兩山間東以石峽湍激而下所謂急水門最爲險惡又  
三日抵岸有館曰碧瀾亭使人由此登陸崎嶇山谷四  
十餘里乃其國都云

宋史卷四百八十七



宋史卷四百八十八

元中書右丞相總裁脫脫等修

列傳第二百四十七

外國四

交趾 大理

交趾本漢初南越之地漢武平南越分其地爲儋耳珠崖南海蒼梧鬱林合浦交趾九真日南凡九郡置交趾刺史以領之後漢置交州晉宋齊梁陳因之又爲交趾郡隋平陳廢郡置州煬帝初廢州置郡唐武德中改交州總管府至德中改安南都護府梁貞明中土豪曲承

美專有其地送款於末帝因授承美節鉞時劉隱擅命嶺表遣將李知順伐承美執之乃并有其地後有楊延藝紹洪皆受廣南署繼爲交阯節度使紹洪卒州將吳昌岌遂居其位昌岌死其弟昌文襲乾德初昌文死其參謀吳處珩峯州刺史矯知護武寧州刺史楊暉牙將杜景碩等爭立管內一十二州大亂部民嘯聚起爲寇盜攻交州先是楊延藝以牙將丁公著攝驩州刺史兼禦蕃都督部領卽其子也公著死部領繼之至是部領與其子璉率兵擊敗處珩等賊黨潰散境內安堵交民德之乃推部領爲交州帥號曰大勝王署其子璉爲節

度使凡三年遜璉位璉立七年聞嶺表平遂遣使貢方物上表內附制以權交州節度使丁璉以檢校太師充靜海軍節度使安南都護又詔以進奉使鄭瑋王紹祚並爲檢校左散騎常侍兼御史大夫八年遣使貢犀象香藥朝廷議崇寵部領降制曰率土來王方推以恩信舉宗奉國宜洽於封崇眷拱極之外臣舉顯親之茂典爾部領世爲右族克保遐方夙慕華風不忘內附屬九州混一五嶺廓清靡限溟濤樂輸琛賫嘉乃令子稱吾列藩特被鴻私以旌義訓介爾眉壽服茲寵章可授開府儀同三司檢校太師封交阯郡王太宗卽位璉又遣

使以方物來賀部領及璉旣死璉弟璿尚幼嗣立稱節  
度行軍司馬權領軍府事大將黎桓擅權樹黨漸不可  
制却遷璿於別第舉族禁錮之代總其衆太宗聞之怒  
乃議舉兵太平興國五年秋詔以蘭州團練使孫全興  
入作使張璿左監門衛將軍崔亮爲陸路兵馬部署自  
邕州路入寧州刺史劉澄軍器庫副使賈湜供奉官閤  
門祇候王僕爲水路兵馬部署自廣州路入是冬黎桓  
遣牙校江巨湟齋方物來貢仍爲丁璿上表曰臣族本  
蠻曾辟處海裔修職貢於宰旅假節制於方隅臣之父  
兄代承闡寄謹保封畧罔敢怠遑爰暨淪亡將墜堂構

將吏耆耄乃屬於臣俾權軍旅之事用安夷落之衆土俗獷悍懇請愈堅拒而弗從慮其生變臣已攝節度行軍司馬權領軍府事願賜真秩令備列藩干冒宸扆伏增震越上察其欲緩王師寢而不報王師進討破賊萬餘衆斬首二千餘級六年春又破賊于白藤江口斬首千餘級獲戰艦二百艘甲冑萬計轉運使侯仁寶率前軍先進全興等頓兵花步七十日以候澄仁寶累促之不進及澄至并軍由水路至多羅村不遇賊復擅迴花步桓詐降以誘仁寶遂爲所害轉運使許仲宣馳奉其事遂班師上遣使就劾澄湜俱澄尋病死戮湜等邕州

市全興至闕亦下吏誅餘抵罪有差仁寶贈工部侍郎  
七年春桓懼朝廷終行討滅復以丁璿爲名遣使貢方  
物上表謝罪八年桓自稱權交州三使留後遣使貢方  
物并以璿表來上帝賜桓詔曰丁氏傳襲三世保據一  
方卿旣受其倚毗爲之心膂克徇邦人之請無負丁氏  
之心朕且欲令璿爲統帥之名卿居副貳之任剗裁制  
置悉繫於卿俟丁璿旣冠有所成立卿之輔翼令德彌  
光崇獎忠勳朕亦何吝若丁璿將材無取童心如故然  
其奕世紹襲載綿星紀一旦捨去節鉞降同士伍理旣  
非便居亦靡安詔到卿宜遣丁璿母子及其親屬盡室

來歸俟其入朝便當揆日降制授卿節旄凡茲兩途卿  
宜審處其一丁璿到京必加優禮今遣供奉官張宗權  
齎詔諭旨當悉朕懷亦賜璿詔書如旨時黎桓已專據  
其土不聽命是歲五月上言占城國水陸象馬數萬來  
寇率所部兵擊走之俘斬千計雍熙二年遣牙校張紹  
馮阮伯簪等貢方物繼上表求正領節鎮二年秋又遣  
使貢方物儋州言占城國人蒲羅遏率其族百餘衆內  
附言爲交州所逼故也是歲十月制曰王者懋建皇極  
寵綏列藩設邸京師所以盛會同之禮胙土方面所以  
表節制之雄矧茲跼鳶之隅克修設羽之貢式當易帥

爰利建侯不忘請命之恭用舉疇勞之典權知交州三  
使留後黎桓兼資義勇特稟忠純能得邦人之心彌謹  
藩臣之禮往者丁璿方在童幼昧於撫綏桓乃肺腑之  
親專掌軍旅之事號令自出威愛並行璿盡解三使之  
權以徇衆人之欲遠輸誠欵求領節旄士燮疆明化越  
俗而咸乂尉佗恭順稟漢詔以無違宜正元戎之稱以  
列通侯之貴控撫夷落對揚天休可檢校太保使持節  
都督交州諸軍事安南都護充靜海軍節度交州管內  
觀察處置等使封京兆郡侯食邑三千戶仍賜號推誠  
順化功臣遣左補闕李若拙國子博士李覺爲使以賜



之端拱元年加桓檢校太尉進邑千戶實封五百戶遣  
戶部郎中魏庠虞部員外郎直史館李度往使焉淳化  
元年夏加桓特進邑千戶實封四百戶遣左正言直史  
館宋鎬右正言直史館王世則又使焉明年六月歸闕  
上令條列山川形勢及黎桓事迹以聞鎬等具奏曰去  
歲秋末抵交州境桓遣牙內都指揮使丁承正等以船  
九艘卒三百人至太平軍來迎由海口入大海冒涉風  
濤頗歷危險經半月至白藤徑入海汊乘潮而行凡宿  
泊之所皆有茅舍三間營葺尚新目爲館驛至長州漸  
近本國桓張皇虛誕務爲誇詫盡出舟師戰權謂之軍

自是宵征抵海岸至交州僅十五里有茅亭五間題曰  
茅徑驛至城一百里驅部民畜產妄稱官牛數不滿千  
揚言十萬又廣率其民混於軍旅以雜色之衣乘船鼓  
譟近城之山虛張白旗以爲陳兵之象俄而擁從桓至  
展郊迎之禮桓歛馬側身問皇帝起居畢按轡偕行時  
以檳榔相遺馬上食之此風俗待賓之厚意也城中無  
居民止有茅竹屋數十百區以爲軍營而府署湫隘題  
其門曰明德門桓質陋而目眇自言近歲與蠻寇接戰  
墜馬傷足受詔不拜信宿之後乃張筵飲宴又出臨海  
以爲娛賓之遊桓跣足持竿入水標魚每中一魚左

右皆叫譟歡躍凡有宴會預坐之人悉令解帶冠以帽子桓多衣花纈及紅色之衣帽以真珠爲飾或自歌勸酒莫能曉其詞嘗令數十人扛大蛇長數丈饋於使館且曰若能食此當治之爲饌以獻焉又羈送二虎以備縱觀皆却之不受士卒殆三千人悉黥其額曰天子軍糧以禾穗日給令自舂爲食兵器止有弓弩木牌梭槍竹槍弱不可用桓輕俛殘忍昵比小人腹心闔豎五七輩錯立其側好狎飲以手令爲樂凡官屬善其事者擢居親近左右有小過亦殺之或鞭其背一百至二百賓佐小不如意亦捶之三十至五十黜爲閹吏怒息乃召

復其位有木塔其制樸陋桓一日請同登遊覽地無寒  
氣十一月猶衣夾衣揮扇云四年進封桓交阯郡王五  
年遣牙校費崇德等來修職貢然桓性本兇狠負阻山  
海屢爲寇害漸失藩臣禮至道元年春廣南西路轉運  
使張觀欽州如洪鎮兵馬監押衛昭美皆上言有交州  
戰船百餘艘寇如洪鎮畧居民劫廩實而去其夏桓所  
管蘇茂州又以鄉兵五千寇邕州所管緣山都巡檢楊  
文傑擊走之太宗志在撫寧荒服不欲問罪觀又言風  
聞黎桓爲丁氏斥逐擁餘衆山海間失其所據故以寇  
鈔自給今則桓已死觀仍上表稱賀詔太常丞陳士隆

高品武元吉奉使嶺南因偵其事士隆等復命所言與  
觀同其實桓尚存而傳聞者之誤觀等不能審覈未幾  
有大賈自交趾回具言桓爲帥如故詔劾觀等會觀病  
卒昭美士隆元吉抵罪先是欽州如洪咄步如昔等三  
鎮皆瀕海交州潮陽民卜文勇等殺人并家亡命至如  
昔鎮鎮將黃令德等匿之桓令潮陽鎮將黃成雅移牒  
來捕令德固不遣因茲海賊連年剽掠二年以工部員  
外郎直史館陳堯叟爲轉運使因賜桓詔書堯叟始至  
遣攝雷州海康縣尉李建中賚詔勞問桓堯叟又至如  
昔詰得匿文勇之由盡擒其男女老少一百三十口召

潮陽鎮吏付之且戒勿加酷法成雅得其人以狀謝堯  
叟桓遂上章感恩并捕海賊二十五人送于堯叟且言  
已約勒谿洞首領不得騷動七月太宗遣主客郎中直  
昭文館李若拙賫詔書充國信使以美玉帶往賜桓若  
拙旣至桓出郊迎然其詞氣尚悖慢謂若拙曰向者劫  
如洪鎮乃外境蠻賊也皇帝知此非交州兵否若使交  
州果叛命則當首攻番禺次擊閩越豈止如洪鎮而已  
若拙從容謂桓曰上初聞寇如洪鎮雖未知其所自然  
以足下拔自交州牙校授之節制固當盡忠以報豈有  
他慮及見執送海賊事果明白然而大臣僉議以爲朝

廷比建節帥以寧海表今旣蠻賊爲寇害乃是交州力不能獨制矣請發勁卒數萬會交兵以剪滅之使交廣無後患上曰未可輕舉慮交州不測朝旨或致驚駭不若且委黎桓討擊之亦當漸至清謐今則不復會兵也桓愕然避席曰海賊犯邊守臣之罪也聖君容貸恩過父母未加誅責自今謹守職約保永清於漲海因北望頓首謝眞宗卽位進封桓南平王兼侍中桓前遣都知兵馬使阮紹恭副使趙懷德以金銀七寶裝交椅一銀盆十犀角象牙五十枚絹紬布萬匹來貢詔陳于萬歲殿太宗神御許紹恭等拜奠及迴賜桓帶甲馬詔書慰

獎咸平四年又遣行軍司馬黎紹留使副何慶常以馴犀一象二象獬二七寶裝金瓶一來貢其年欽州言交州効誠場民及頭首八州使黃慶集等數百人來投有詔慰撫遣還本道廣南西路言黎桓迎受官告使黃成雅附奏自今國朝加恩願遣使至本道以寵海裔先是使至交州桓卽以供奉爲辭因緣賦歛上聞之止令疆吏召授命不復專使景德元年又遣其子攝驩州刺史明提來貢懇求加恩使至本道慰撫遐裔許之仍以明提爲驩州刺史二年上元節賜明提錢令與占城大食使觀燈宴飲因遣工部員外郎邵晔充國信使三年桓



卒立中子龍鉞龍鉞兄龍全劫庫財而遁其弟龍廷殺  
龍鉞自立龍廷兄明護率扶闌砮攻戰明提以國亂不  
能還特詔廣州優加資給知廣州凌策等言桓諸子爭  
立衆心離叛頭首黃慶集黃秀蠻等千餘人以不從驅  
率戮及親族來投廉州請發本道二千人平之慶集等  
願爲前鋒上以桓素忠順屢修職貢今幸亂而伐喪不  
可就改國信使邵晔爲緣海安撫使令曉譬之慶集等  
仍計口賜田糧晔乃貽書交州諭以朝廷威德如其自  
相魚肉久無定位偏師問罪則黎氏盡滅矣明護懼卽  
奉龍廷主軍事龍廷自稱節度開明王遂欲修貢晔以

聞上曰遐荒異俗不曉事體何足恠也令削去僞官暉  
又言頭首黃慶集先避亂歸化其種族尚多若復遣還  
慮遭屠戮詔以慶集隸三班釐務于郴州遂許入貢四  
年龍廷稱權安南靜海軍留後遣弟峯州刺史明昶副  
使安南掌書記殿中丞黃成雅等來貢會含光殿大宴  
上以成雅坐遠欲稍升位著訪於宰相王旦旦曰昔子  
產朝周周王饗以上卿之禮子產固辭受下卿之禮而  
還國家惠綏遠方優待客使固無嫌也乃升成雅于尚  
書省五品之次詔拜龍廷特進檢校太尉充靜海軍節  
度觀察處置等使安南都護兼御史大夫上柱國仍封

交趾郡王食邑三千戶食實封一千戶賜推誠順化功臣仍賜名至忠給以旌節又追贈桓中書令南越王進奉使黎明昶等並進秩大中祥符元年天書降加翊戴功臣食邑七百戶實封三百戶東封畢加至忠同平章事食邑一千戶食實封四百戶二年廣南西路言蠻人劫海口蝥尸如洪砦主李文著以輕兵襲逐中流矢死詔督安南捕賊明年執狄獠十三人以獻至忠又遣推官阮守疆以犀角象齒金銀紋縵等來貢并獻馴犀一上以犀違土性不可豢畜卻不納又以逆至忠意使者旣去乃令縱之海滋三年遣使來朝表求甲冑具裝詔

從其請又求互市于邕州本道轉運使以聞上曰瀕海之民數患交州侵寇仍前止許廉州及如洪砦互市蓋爲邊隅控扼之所今或直趨內地事頗非便詔令本道以舊制諭之至忠纔年二十六苛虐不法國人不附大校李公蘊尤爲至忠親任嘗令以黎爲姓其年遂圖至忠逐之殺明提明昶等自稱留後遣使貢奉上曰黎桓不義而得公蘊尤而効之甚可惡也然以其蠻俗不足責遂用桓故事制授特進檢校太傅充靜海軍節度觀察處置等使安南都護兼御史大夫上柱國封交阯郡王食邑三千戶實封一千戶賜推誠順化功臣公蘊又

表求太宗御書詔賜百軸四年祀汾陰后土公蘊遣節  
度判官梁任文觀察巡官黎再嚴以方物來貢禮成加  
公蘊同平章事食邑一千戶實封四百戶任文等並優  
進秩五年夏以進奉使李仁美爲誠州刺史陶慶文爲  
太常丞其從隸有道病死者所賜附還其家是冬聖祖  
降加公蘊開府儀同三司食邑七百戶實封三百戶賜  
翊戴功臣七年春又加保節守正功臣食邑一千戶實  
封四百戶詔交趾諸國使入貢者所在館餼供億務令  
豐備其年遣知唐州刺史陶碩等來貢詔以碩爲順州  
刺史充安南靜海軍行軍司馬副使吳懷副爲澄州刺

史充節度副使先是交州狄獠張婆看避罪來奔知欽州穆重穎召之至中路復拒焉都巡檢臧嗣遂令如洪砦犒以牛酒交州偵知其事因捕狄獠故鈔如洪砦掠人畜甚衆詔轉運司督公蘊追索仍令疆吏自今不得誘召蠻獠致生事公蘊或間歲或仍歲以方物入貢天禧元年進封公蘊南平王加食邑一千戶實封四百戶二年加檢校太尉食邑一千戶實封四百戶每加恩皆遣使將命至其境上仍賜器幣襲衣金帶鞍馬焉仁宗卽位加公蘊檢校太師遣長州刺史李寬秦都護副使阮守疆來貢天聖六年遣驩州刺史李公顯來貢除敘

州刺史既而令其子弟及其壻申承貴率衆內寇詔廣南西路轉運司發溪峒丁壯討捕之未幾卒年四十四其子德政自稱權知留後事來告哀贈公蘊爲侍中南越王命本路轉運使王惟正爲祭奠使又爲賜官告使除德政檢校太尉靜海軍節度使安南都護交趾郡王天聖九年遣知峯州刺史李偓佺知愛州刺史帥日新等來謝以偓佺爲驩州刺史日新爲珍州刺史明道元年恭謝加同中書門下平章事景祐中郡人陳公永等六百餘人內附德政遣兵千餘境上捕逐之詔遣還仍戒德政毋得輒誅殺尋遣靜海軍節度判官陳應機掌

書記王惟慶來貢以應機爲太子中允惟慶爲大理寺丞德政加檢校太師三年其甲峒及諒州門州蘇茂州廣源州大發峒丹波縣蠻寇邕州之思陵州西平州石西州及諸峒畧居人馬牛焚室廬而去下詔責問之且令捕酋首正其罪以聞寶元元年進封南平王康定元年遣知峯州刺史帥用和節度副使杜猶興等來貢慶歷三年又遣節度副使杜慶安三班奉職梁材來以慶安爲順州刺史材爲太子左監門率府率六年又遣兵部員外郎蘇仁祚東頭供奉官陶惟幄來以仁祚爲工部郎中惟幄爲內殿崇班明年又遣祕書丞杜文府左



侍禁文昌來以文府爲屯田員外郎昌爲內殿崇班初  
德政發兵取占城朝廷疑其內畜姦謀乃訪自唐以來  
所通道路凡十六處令轉運使杜杞度其要害而成守  
之然其後亦未嘗寇邊前後累貢馴象皇祐二年邕州  
誘其蘇茂州韋紹嗣紹欽等三千餘人入居省地德政  
表求所誘詔盡還之仍令德政約束邊戶毋相侵犯其  
後廣源州蠻儂智高反德政率兵二萬由水路欲入助  
王師朝廷優其賜而卻其兵至和二年卒其子曰尊遣  
人告哀命廣南西路轉運使尚書屯田員外郎蘇安世  
爲弔贈使贈德政爲侍中南越王賻賚甚厚尋除日尊

特進檢校太尉靜海軍節度使安南都護封交阯郡王  
嘉祐三年貢異獸二四年寇欽州思稟管五年與甲峒  
賊寇邕州詔知桂州蕭固發部兵與轉運使宋咸提點  
刑獄李師中同議掩擊又詔安撫使余靖等發兵捕討  
靖遣謀誘占城同廣南西路兵甲趨交阯日尊惶怖上  
表待罪詔未得舉兵聽日尊貢奉至京師八年遣文思  
使梅景先副使大理評事李繼先貢馴象九年四月戊  
寅以大行皇帝詔及遺留物賜日尊加同中書門下平  
章事是日交阯使辭命內侍省押班李繼和喻以申紹  
泰入寇本路屢乞討伐而朝廷以紹泰一夫肆狂又本

道已遣使謝罪故未欲興兵治平初知桂州陸誥言交州來求儂宗旦男日新及欲取溫悶洞等地帝問交阯於何年割據輔臣對曰自唐至德中改安南都護府梁貞明中土豪曲承美專有此地韓琦曰向以黎桓叛命太宗遣將討伐不服後遣使招誘始效順交州山路嶮僻多潦霧瘴毒之氣雖得其地恐不能守也神宗卽位進封日尊南平王熙寧元年加開府儀同三司二年表言占城國久闕貢臣親帥兵討之虜其王詔以其使郭士安爲六宅副使陶宗元爲內殿崇班日尊自帝其國僭稱法天應運崇仁至道慶成龍祥英武睿文尊德聖

神皇帝尊公蘊爲太祖神武皇帝國號大越改元寶象  
又改神武五年三月日尊卒命廣西轉運使康衛爲弔  
贈使予所奪州縣詔報之曰卿撫有南交世受王爵而  
乃背德奸命竊暴邊城棄祖考忠順之圖煩朝廷討伐  
之舉師行深入勢蹙始歸迹其罪尤在所絀削今遣使  
修貢上章致恭詳觀詞情灼見悛悔朕撫綏萬國不異  
邇遐但以邕欽之民遷劫炎陬久失鄉井俟盡送還省  
界卽以廣源等賜交州乾順初約歸三州官吏千人久  
之才送民二百二十一口男子年十五以上皆刺額曰  
天子兵二十以上曰投南朝婦人刺左手曰官客以舟

載之而泥其戶牖中設燈燭日行一二十里則止而僞  
作更鼓以報凡數月乃至蓋以給示海道之遠也順州  
落南深置戍鎮守被罹瘴霧多病沒陶弼亦終於官朝  
廷知其無用乃悉以四州一縣還之然廣源舊隸邕管  
羈縻本非交趾所有也元豐五年獻馴象二犀角象齒  
百六年以追捕儂智會爲辭犯歸化州又遣其臣黎文  
盛來廣西辨理順安歸化境界經畧使熊本遣左江巡  
檢成卓與議文盛稱陪臣不敢爭執詔以文盛能遵乾  
德恭順之意賜之袍帶及絹五百匹乃以八隘之外保  
樂六縣宿桑二峒予乾德哲宗立加同中書門下平章

事元祐中又數上表求勿惡勿陽峒地詔不許二年遣  
使入貢進封南平王徽宗時累加開府儀同三司檢校  
太師大觀初貢使至京乞市書籍有司言法不許詔嘉  
其慕義除禁書卜筮陰陽曆算術數兵書敕令時務邊  
機地理外餘書許買政和末又詔以交人自熙寧以來  
全不生事特寬和市之禁宣和元年加乾德守司空建  
炎元年詔廣西經畧安撫司禁邊民毋受安南逋逃從  
其主乾德之請也四年安南入貢詔卻其方物之華靡  
者賜敕書厚其報以懷柔之紹興二年乾德卒贈侍中  
追封南越王子陽煥嗣授靜海軍節度使特進檢校太

尉封交趾郡王賜推誠順化功臣八年陽煥卒以轉運副使朱芾充弔祭使贈陽煥開府儀同三司追封南平王子天祚嗣授官如其父初封之制九年詔廣西帥司毋受趙智之入貢初乾德有側室子奔大理變姓名爲趙智之自稱平王聞陽煥死大理遣歸與天祚爭立求入貢欲假兵納之帝不許十七年詔文思院製鞍羈以賜天祚二十一年累加天祚崇義懷忠保信鄉德安遠承和功臣二十五年詔館安南使者於懷遠驛賜宴以彰異數進封天祚南平王賜襲衣金帶鞍馬二十六年命右司郎中汪應辰宴安南使者於玉津園八月天祚

遣李國等以金珠沉水香翠羽良馬馴象來貢詔加天  
祚檢校太師增食邑隆興二年天祚遣尹子思鄧碩儼  
等貢金銀象齒香物乾道六年累加天祚歸仁協恭繼  
美遵度履正彰善功臣帝自卽位屢却安南貢使九年  
天祚復遣尹子思李邦正求入貢帝嘉其誠許之詔館  
於懷遠驛廣南西路經畧安撫使范成大言本司經畧  
諸蠻安南在撫綏之內其陪臣豈得與中國王官亢禮  
政和間貢使入境皆庭參不復報謁宜遵舊制於禮爲  
得朝廷從其請淳熙元年二月進封天祚安南國王加  
號守謙功臣二年賜安南國印三年賜安南國曆日天



祚卒明年子龍翰嗣位授靜海軍節度使觀察處置等使特進檢校太尉兼御史大夫上柱國特封安南國王加食邑仍賜推誠順化功臣制曰卽樂國以肇封旣從世襲極真王而錫命何待次升示殊禮也五年貢方物上表稱謝九年詔卻安南所貢象以其無用而煩民他物亦止受什一十六年累加龍翰守義奉國履常懷德功臣光宗卽位奉表入貢稱賀寧宗朝賜衣帶器幣累加謹度思忠濟美勤禮保節歸仁崇謙協恭功臣及食邑焉嘉定五年龍翰卒詔以廣西運判陳孔碩充弔祭使特贈侍中依前安南國王制以其子吳岳襲封其爵

位給賜如龍翰始封之制仍賜推誠順化功臣其後謝表不至遂輟加恩吳崑卒無子以女昭聖主國事遂爲其婿陳日熨所有李氏有國自公蘊至吳崑凡八傳二百二十餘年而國亡淳祐二年詔安南國王陳日熨元賜効忠順化保節功臣增守義二字寶祐六年詔安南情狀叵測申飭邊備景定二年貢象一三年表乞世襲詔日熨授檢校太師安南國大王加食邑男威晃授靜海軍節度使觀察處置使檢校太尉兼御史大夫上柱國安南國王効忠順化功臣賜金帶器幣鞍馬咸淳五年詔安南國王父日熨國王威晃加食邑八年明堂禮

成日張威冕各加食邑賜鞍馬等物  
大理國卽唐南詔也熙寧九年遣使貢金裝碧玕山氊  
鬪刀劒犀皮甲鞍轡自後不常來亦不領於鴻臚政和  
五年廣州觀察使黃璘奏南詔大理國慕義懷徠願爲  
臣妾欲聽其入貢詔璘置局於賓州凡有奏請皆俟進  
止六年遣進奉使天駟爽彥賁李紫琮副使坦綽李伯  
祥來詔璘與廣東轉運副使徐惕偕詣闕其所經行令  
監司一人主之道出荆湖南當由邵州新化縣至鼎州  
而璘家潭之湘鄉轉運判官喬方欲媚璘乃排比由邵  
至潭由潭至鼎一路御史劾其當農事之際而觀望勞

民詔罷方紫琮等過鼎聞學校文物之盛請於押伴求  
詣學瞻拜宣聖像邵守張察許之遂往遍謁見諸生又  
乞觀御書閣舉笏叩首七年二月至京師貢馬三百八  
十匹及麝香牛黃細氈碧玕山諸物制以其王段和譽  
爲金紫光祿大夫檢校司空雲南節度使上柱國大理  
國王朝廷以爲璘功并其子暉昨皆遷官少子暉爲閣  
門宣贊舍人已而知桂州周穉劾璘詐冒璘得罪自是  
大理復不通於中國間一至黎州互市紹興三年十月  
廣西奏大理國求入貢及售馬詔卻之不欲以虛名勞  
民也朱勝非奏曰昔年大理入貢言者深指其妄黃璘

由是獲罪帝曰遐方異域何由得實但讎當其馬價則馬方至用益騎兵不爲無補也六年七月廣西經略安撫司奏大理復遣使奉表貢象馬詔經略司護送行在優禮荅之九月翰林學士朱震上言乞諭廣西帥臣凡市馬當擇謹厚者任之母遣好功喜事之人以啓邊釁異時南北路通則漸減廣西市馬之數庶幾消患於未然詔從之淳熙二年十一月知靜江府張栻申嚴保伍之禁又以邕管戍兵不能千人左右江峒丁十餘萬每恃以爲藩蔽其邕州提舉巡檢官宜精其選以撫峒丁欲制大理當自邕管始云

知縣大... 其... 宜... 禁... 平... 吳... 申... 劉... 無... 宋... 宋史卷四百八十八具... 其... 其... 其...

宋史卷四百八十九

元中書右丞相總裁脫脫等修

列傳第二百四十八

外國五

占城 真臘 蒲甘 邈黎

三佛齊

閩婆 南毗附 勃泥 注輦

丹眉流

占城國在中國之西南東至海西至雲南南至真臘國  
北至驩州界汎海南去三佛齊五日程陸行至賓陀羅  
國一月程其國隸占城焉東去麻逸國二日程蒲端國

七日程北至廣州便風半月程東北至兩浙一月程西  
北至交州兩日程陸行半月程其地東西七百里南北  
三千里南曰施備州西曰上源州北曰烏里州所統大  
小州三十八不盈三萬家其國無城郭有百餘村村落  
戶三五百或至七百亦有縣鎮之名土地所出箋沉香  
檳榔烏楠木蘇木白藤黃蠟吉貝花布絲絞布白氎布  
藤篔貝多葉簞金銀鐵錠等物五穀無麥有秔米粟豆  
麻子官給種一斛計租百斛果實有蓮甘蔗蕉子椰子  
鳥獸多孔雀犀牛畜產多黃牛水牛而無驢亦有山牛  
不任耕耨但殺以祭鬼將殺令巫祝之曰阿羅和及拔



譯云早教他託生民獲犀象皆輸於王國人多乘象或  
軟布兜或於交州市馬頗食山羊水兕之肉其風俗衣  
服與大食國相類無絲蠶以白氎布纏其胷垂至於足  
衣衫窄袖撮髮爲髻散垂餘髻於其後互市無緡錢止  
用金銀較量錙銖或吉貝錦定博易之直樂器有胡琴  
笛鼓大鼓樂部亦列舞人其王腦後髻髻散披吉貝衣  
戴金花冠七寶裝纓絡爲飾脛股皆露躡革履無襪婦  
人亦腦後撮髻無笄梳其服及拜揖與男子同王每日  
午坐憚官屬謁見膜拜一而止白事畢復膜拜一而退  
或出遊看象采獵觀漁皆數日方還近則乘軟布兜遠

則乘象或乘一木杠四人舁之先令一人持檳榔盤前  
導從者十餘輩各執弓箭刀槍手牌等其民望之膜拜  
一而止日或一再出每歲稻熟王自刈一把從者及羣  
婦女競割之其王或以兄爲副王或以弟爲次王設高  
官凡八員東西南北各二分治其事無奉祿令其所管  
土俗資給之別置文吏五十餘員有郎中員外秀才之  
稱分掌資儲寶貨等事亦無資奉但給龜魚充食及免  
調役而已又有司帑廩者十二員主軍卒者二百餘員  
皆無月奉勝兵萬餘人月給秬米二斛冬夏衣布各三  
匹至五匹每夕唯王升床而臥諸臣皆寢於地薦親近

之臣見王卽胡跪作禮稍疎遠者但拱手而已其風俗  
正月一日牽象周行所居之地然後驅逐出郭謂之逐  
邪四月有遊船之戲定十一月十五日爲冬至人皆相  
賀州縣以土產物帛獻其王每歲十二月十五日城外  
縛木爲塔王及人民以衣物香藥置塔上焚之以祭天  
人有疾病旋采生藥服食地不產茶亦不知醞釀之法  
止飲椰子酒兼食檳榔刑禁亦設枷鎖小過以四人拽  
伏於地藤杖鞭之二人左右更五捶扑量其或五六十  
至一百當死者以繩繫於樹用梭槍舂喉而殊其首若  
故殺刼殺令象踏之或以鼻捲撲於地象皆素習將刑

人卽令豢養之以數諭之悉能曉焉犯姦者男女共入  
牛以贖罪負國王物者以繩拘於荒塘物充而後出之  
其國前代罕與中國通周顯德中其王釋利因德漫遣  
其臣蒲訶散貢方物有雲龍形通犀帶菩薩石又有薺  
薇水灑衣經歲香不歇猛火油得水愈熾皆貯以瑠璃  
瓶建隆二年其王釋利因隋盤遣使蒲訶散來朝表章  
書於貝多葉以香木函盛之貢犀角象牙龍腦香藥孔  
雀四大食瓶二十使廻錫賚有差以器幣優賜其王三  
年又貢象牙二十二株乳香千斤乾德四年其王悉利  
因隋盤遣使因隋玠李帝婆羅貢馴象牯犀象牙白氈

哥縵越諾王妻波良僕瑁男占謀律秀瓊等各貢香藥  
五年又遣使李畔李被瑳相繼來貢獻開寶三年遣使  
貢方物雌象一四年悉利多盤副國王李耨王妻郭氏  
子蒲路雞波羅等並遣使來貢五年其王波美稅褐印  
茶遣使莆訶散來貢六年又貢七年又貢孔雀傘二西  
天烽鐵四十斤九年遣使朱陀利陳陀野等來貢太平  
興國二年其王波美稅陽布印茶遣使李牌來貢三年  
其王及男達智遣使來貢四年遣使李木吒哆來貢六  
年交州黎桓上言欲以占城俘九十三人獻於京師太  
宗令廣州止其俘存撫之給衣服資糧遣還占城詔諭

其王七年遣使乘象入貢詔留象廣州畜養之八年獻  
馴象能拜伏詔畜於京畿寧陵縣雍熙二年其王施利  
陀盤吳日歡遣婆羅門金歌麻獻方物且訴爲交州所  
侵詔答令保國睦鄰三年其王劉繼宗遣使李朝仙來  
貢儋州上言占城人蒲羅遏爲交州所逼率其族百口  
來附四年秋廣州上言雷恩州關送占城夷人斯當李  
娘并其族一百五十人來歸分隸南海清遠縣端拱元  
年廣州又言占城夷人忽宣等族三百一人求附淳化  
元年新王楊陁排自稱新坐佛逝國楊陁排遣使李臻  
貢馴犀方物表訴爲交州所攻國中人民財寶皆爲所

略上賜黎桓詔令各守境三年遣使李良莆貢方物賜其王白馬二兵器等本國僧淨戒獻龍腦金鈴銅香鑪如意等各優賜之至道元年正月其王遣使來貢表奉言前進奉使李良莆迴伏蒙聖慈賜臣細馬二疋旗五百銀裝劍五口銀纏槍五條弓弩各五張及箭等戴恩感懼稽首稽首臣生長外國夙遠天都竊承皇帝聖明威德廣大臣不憚介居海裔遣使入朝皇帝不棄蠻夷山國曲加優賜然臣自爲土長聲勢尙卑常時外國頗相侵撓況以前民庶如芥隨風星散流離各不自保近蒙皇帝賜臣內閑駟駿及旗幟兵器等隣國聞之知臣

荷大國之寵而各懼天威不敢謀害今臣一國安寧流  
民來復若非皇帝天德加護何以至此臣之一國仰望  
仁聖覆之如天載之如地臣自思惟鴻恩不淺且自天  
子之都至臣所居之國涉海綿邈不啻數萬里而所賜  
之馬及器械等並安全而至皆聖德之所及也自前本  
國進奉未嘗有旌旗弓矢之賜臣今何幸獨受異恩此  
蓋天威廣被壯臣土疆臣雖殞身無以上報兼臣貢使  
往復資給備至恩重山岳不可具陳今特遣專使李波  
珠副使訶散判官李磨勿等進奉犀角十株象牙三十  
株玳瑁十斤龍腦二斤沉香百斤夾箋黃熟香九十斤



檀香百六十斤山得雞二萬四千三百雙胡椒二百斤  
簞席五前件物固非珍奇惟表誠懇臣生居異域幸遇  
明時不貴殊珍惟重良馬儻皇帝念及外國不罪懇求  
若使介南歸願垂頒賜臣之幸矣兼臣本國元有流民  
三百散居南海曾蒙聖旨許令放還今有猶在廣州者  
本國舊有進奉夷人羅常占見駐廣州乞詔本州盡數  
點集兵籍以付常占令造船船乘便風部領歸國冀得  
安其生聚以實舊疆至於萬里感恩一心事上臣之志  
也上覽表遣使詣廣州詢問願還者悉付波珠使還復  
賜白馬二遂爲常制咸平二年其王楊普俱毗茶逸施

離遣使朱陳堯副使蒲薩陀婆判官黎姑倫以犀象玳  
瑁香藥來貢賜堯等冠帶衣褥有差景德元年又遣使  
來貢詔以良馬介冑戎器等賜之四年遣使布祿爹地  
加等奉表來朝表函藉以文錦詞曰占城國王楊普俱  
毗茶室離頓首言臣聞二帝封疆南止屆於湘楚三王  
境界北不及於幽燕仰矚昌時實邁往跡伏惟皇帝陛  
下乾坤授氣日月儲英出震居尊承基御極慈悲敷於  
天下聲教被於域中業茂前王功芳徂后蒼生是念黃  
屋非心無方不是生靈有土並爲臣妾真風遍布霈澤  
周行凡沐照臨共增聳抃臣生於邊鄙幸襲華風蟻垤

蜂房聊爲遂性龍樓鳳閣尚阻觀光再念自假天威獲  
全封部隣無侵奪俗有舒蘇每歲拜遣下臣問寧上國  
蒙聖下恩霑行葦福及豚魚特因廻人頒賜戎器臣本  
土惟望闕焚香歡呼拜受心知多幸曷答洪恩聖君旣  
念於賓王微懇肯忘於述職今遣專信臣布祿爹地加  
副使臣除逋麻瑕珈耶判官臣皮霸抵一行人力等部  
署土毛遠充歲貢雖表楚茅之禮實懷魯酒之憂虔望  
睿明甫寬譴戮專信臣等廻日軍容器仗耀武之物伏  
願重加賜賚蓋念忝爲臣子合告君親服飾車輿威儀  
斧鉞不敢私制惟望恩頒干冒冕旒不任死罪布祿爹

地加言本國舊隸交州後奔於佛遊北去舊所七百里  
使還賜物甚厚大中祥符三年國主施離霞離鼻麻底  
遣使朱淳禮來貢四年遣使貢師子詔畜於苑中使者  
留二蠻人以給豢養上憐其懷土厚給資糧遣還八年  
遣使波輪訶羅帝來貢訶羅帝因上言有弟陶珠頃自  
交州押馴象赴闕今幸得見欲携以還許之仍賜陶珠  
衣幣裝錢天禧二年其王尸嘿排摩牒遣使羅皮帝加  
以象牙七十二株犀角八十六株玳瑁千片乳香五十  
斤丁香花八十斤荳蔻六十五斤沉香百斤箋香二百  
斤別箋一劑六十八斤茴香百斤檳榔千五百斤來貢

羅皮帝加言國人詣廣州或風漂船至石塘卽累歲不  
達矣三年使還詔賜尸嘿排摩牒銀四千七百兩并戎  
器鞍馬海上又有蒲端國三麻蘭國勿巡國蒲婆衆國  
大中祥符四年祀汾陰並遣使來貢先是咸平景德中  
蒲端國主其陵數遣使來貢方物及獻紅鸚鵡其後國  
主悉離琶大遐至亦以金版鐫表來上其使已絮漢上  
言伏見詔旨給賜占城使鞍勒馬大神旗各二乞如恩  
列有司以蒲端在占城下請賜雜絲小旗五從之天聖  
八年十月占城王陽補孤施離皮蘭德加拔麻疊遣使  
李蒲薩麻瑕陀琶來貢木香玳瑁乳香犀角象牙慶歷

元年九月廣東商人邵保見軍賊鄂鄰百餘人在占城  
轉運司選使臣二人賫詔書器幣賜占城購鄰致闕下  
餘黨令就戮之明年十一月其王刑卜施離值星霞弗  
遣使獻馴象三皇祐二年正月又使俱舍喇波微收羅  
婆麻提楊卜貢象牙二百一犀角七十九表二通一以  
本國書一以中國書五年四月其使蒲思馬應來貢方  
物嘉祐元年閏三月其使蒲息陁琶貢方物還至太平  
州江岸崩沉失行橐明年正月詔廣州賜銀千兩六年  
九月又獻馴象七年正月廣西安撫經略司言占臘素  
不習兵與交趾鄰常苦侵軼而占城復近修武備以抗

交趾將繇廣東路入貢京師望撫以恩信五月其使頓  
琶尼來貢方物六月賜其王施里律茶盤麻常楊溥白  
馬一從其求也熙寧元年其王楊卜尸利律陀般摩提  
婆遣使貢方物乞市驛馬詔賜白馬一令於廣州買騾  
以歸五年貢瑠璃珊瑚酒器龍腦乳香丁香萆登茄紫  
曠七年交州李乾德言其王領兵三千人并妻子來降  
以正月至本道九年復遣使來言其國自海道抵真臘  
一月程西北抵交州四十日皆山路所治聚落一百五  
大略如州縣王年三十六歲著大食錦或川法錦大衫  
七條金纓珞戴七寶裝成金冠躡紅皮履出則從者五

百人十婦人執金柈合貯檳榔導以樂王師討交趾以  
其素仇詔使乘機協力除蕩行營戰棹都監楊從先遣  
小校樊實諭旨實還言其國選兵七千扼賊要路其王  
以木葉書回牒詔使上之然亦不能成功後兩國同入  
貢占城使者乞避交人詔遇朔日朝文德殿分東西立  
望日則交人入垂拱殿而占城趨紫宸大宴則東西坐  
元祐七年又表言如天朝討交趾願率兵掩襲朝廷以  
交趾數入貢不絕臣節難以興師答敕書報之而以其  
使良保故倫軋丹副使傍木知突爲保順郎將政和中  
授其王楊卜麻疊金紫光祿大夫領廉白州刺史楊卜



麻疊言身縻化外不霑祿食願得薄授奉給壯觀小國  
許之宣和元年進檢校司空兼御史大夫懷遠軍節度  
琳州管內觀察處置使封占城國王自是每遇恩輒降  
制加封邑建炎三年楊卜麻疊遣使入貢遇郊恩制授  
檢校太傅加食邑紹興二十五年其子鄒時闌巴嗣立  
遣使進方物求封爵錫宴於懷遠驛以其父初封之爵  
授之報賜甚厚乾道三年子鄒亞娜嗣掠大食國方物  
遣人來貢以求封爵爲其國人所訴詔卻之遂不議其  
封七年閩人有浮海之吉陽軍者風泊其舟抵占城其  
國方與真臘戰皆乘大象勝負不能決閩人教其王當

習騎射以勝之王大說具舟送之吉陽市得馬數十疋歸戰大捷明年復來瓊州拒之憤怒大掠而歸淳熙二年嚴馬禁不得售外蕃三年占城歸所掠生口八十三人求通商詔不許四年占城以舟師襲真臘傳其國都慶元以來真臘大舉伐占城以復讎殺戮殆盡俘其主以歸國遂亡其地悉歸真臘

真臘國亦名占臘其國在占城之南東際海西接蒲甘南抵加羅希其縣鎮風俗同占城地方七千餘里有銅臺列銅塔二十有四銅象八以鎮其上象各重四千斤其國有戰象幾二十萬馬多而小政和六年十二月遣

進奏使奏化郎將鳩摩僧哥副使安化郎將摩君明稽  
唵等十四人來貢賜以朝服僧哥言萬里遠國仰投聖  
化尙拘卉服未稱區區嚮慕之誠願許服所賜詔從之  
仍以其事付史館書諸策明年三月辭去宣和二年又  
遣郎將摩臘摩禿防來朝廷官封其王與占城等建炎  
二年以郊恩授其王金哀賓深檢校司徒加食邑遂定  
爲常制其屬邑有真里富在西南隅東南接波斯蘭西  
南與登流眉爲鄰所部有六十餘聚落慶元六年其國  
主立二十年矣遣使奉表貢方物及馴象二詔優其報  
賜以海道遠涉後母再入貢

蒲甘國崇寧五年遣使入貢詔禮秩視注輦尙書省言  
注輦役屬三佛齊胡熙寧中敕書以大背紙緘以匣襪  
今蒲甘乃大國王不可下視附庸小國欲如大食交趾  
諸國禮凡制詔並書以白背金花綾紙貯以閒金鍍管  
籥用錦絹夾襪緘封以往從之

邈黎國元祐四年般次冷移四抹粟迷等賫于闐國黑  
汗王并本國王表章來有司以其國未嘗入貢請視于  
闐條式從之

三佛齊國蓋南蠻之別種與占城爲隣居真臘闍婆之  
閒所管十五州土產紅藤紫礦箋沉香檳榔椰子無緝

錢土俗以金銀貿易諸物四時之氣多熱少寒冬無霜  
雪人用香油塗身其地無麥有米及青白豆雞魚鵝鴨  
頗類中土有花酒椰子酒檳榔酒蜜酒皆非麴蘖所醞  
飲之亦醉樂有小琴小鼓崑崙奴踏曲爲樂國中文字  
用梵書以其王指環爲印亦有中國文字上章表卽用  
焉累甃爲城周數十里用椰葉覆屋人民散居城外不  
輸租賦有所征伐隨時調發立酋長率領皆自備兵器  
糧糗汎海使風二十日至廣州其王號詹卑其國居人  
多蒲姓唐天祐元年貢物授其使都蕃長蒲訶栗立寧  
遠將軍建隆元年九月其王悉利胡大霞里檀遣使李

遮帝來朝貢二年夏又遣使蒲茂貢方物是冬其王室  
利烏耶遣使茶野伽副使嘉末吒朝貢其國號生留王  
李犀林男迷日來亦遣使同至貢方物三年春室利烏  
耶又遣使李麗林副使李鴟末判官吒吒壁等來貢廻  
賜以白犖牛尾白磁器銀器錦線鞍轡二副開寶四年  
遣使李何末以水晶火油來貢五年又來貢七年又貢  
象牙乳香薔薇水萬歲棗扁桃白沙糖水水晶指環瑠璃  
瓶珊瑚樹八年又遣使蒲陁漢等貢方物賜以冠帶器  
幣太平興國五年其王夏池遣使茶龍眉來是年潮州  
言三佛齊國蕃商李甫誨乘船舶載香藥犀角象牙至

海口會風勢不便飄船六十日至潮州其香藥悉送廣州八年其王遐至遣使蒲押陀羅來貢水晶佛錦布犀牙香藥雍熙二年舶主金花茶以方物來獻端拱元年遣使蒲押陀黎貢方物淳化三年冬廣州上言蒲押陀黎前年自京迴聞本國爲闍婆所侵住南海凡一年今春乘舶至占城偶風信不利復還乞降詔諭本國從之咸平六年其王思離味囉無尼佛麻調華遣使李加排副使無陁李南悲來貢且言本國建佛寺以祝聖壽願賜名及鐘上嘉其意詔以承天萬壽爲寺額并鑄鐘以賜授加排歸德將軍無陁李南悲懷化將軍大中祥符

元年其王思離麻囉皮遣使李眉地副使蒲婆藍判官  
麻河勿來貢許赴泰山陪位於朝覲壇遣賜甚厚天禧  
元年其王霞遲蘇勿吒蒲迷遣使蒲謀西等奉金字表  
貢真珠象牙梵夾經崑崙奴詔許謁會靈觀游太清寺  
金明池及還賜其國詔書禮物以慰獎之天聖六年八  
月其王室離疊華遣使蒲押陀羅歇及副使判官亞加  
盧等來貢方物舊制遠國使人貢賜以間金塗銀帶時  
特以渾金帶賜之熙寧十年使大首領地華伽囉來以  
爲保順慕化大將軍賜詔寵之曰吾以聲教覆露方域  
不限遠邇苟知夫忠義而來者莫不錫之華爵耀以美



名以寵異其國爾悅慕皇化浮海貢琛吾用汝嘉併超  
等秩以昭忠義之勸元豐中使至者再率以白金真珠  
婆律薰陸香備方物廣州受表入言俟報乃護至闕下  
天子念其道里遙遠每優賜遣歸二年賜錢六萬四千  
緡銀一萬五百兩官其使羣陀畢羅爲寧遠將軍官陀  
旁亞里爲保順郎將畢羅乞買金帶白金器物及僧紫  
衣師牒皆如所請給之三年廣州南蕃綱首以其主管  
國事國王之女唐字書寄龍腦及布與提舉市舶孫迥  
迥不敢受言於朝詔令估直輸之官悉市帛以報五年  
遣使皮襪副使胡仙判官地華加羅來入見以金蓮花

貯真珠龍腦撒殿官皮襪爲懷遠將軍胡仙加羅爲郎  
將加羅還至雍邱病死賻以絹五十疋六年又以其使  
薩打華滿爲將軍副使羅悉沙文判官悉理沙文爲郎  
將紹聖中再入貢紹興二十六年其王悉利麻霞囉陀  
遣使入貢帝曰遠人向化嘉其誠耳非利乎方物也其  
王復以珠獻宰臣秦檜時檜已死詔償其直而收之淳  
熙五年復遣使貢方物詔免赴闕館於泉州

閩婆國在南海中其國東至海一月汎海半月至崑崙  
國西至海四十五日南至海三日汎海五日至大食國  
北至海四日西北汎海十五日至勃泥國又十五日至

三佛齊國又七日至古邏國又七日至柴歷亭抵交阯  
達廣州其地平坦宜種植產稻麻粟豆無麥民輸十一  
之租煮海爲鹽多魚鱉雞鴨山羊兼椎牛以食果實有  
木瓜椰子蕉子蔗芋出金銀犀牙箋沉檀香茴香胡椒  
檳榔硫黃紅花蘇木亦務蠶織有薄絹絲絞吉貝布剪  
銀葉爲錢博易官以粟一斛二斗博金一錢室宇壯麗  
飾以金碧中國賈人至者待以賓館飲食豐潔地不產  
茶其酒出於椰子及蝦蟇丹樹蝦蟇丹樹華人未嘗見  
或以桄榔檳榔釀成亦甚香美不設刑禁雜犯罪者隨  
輕重出黃金以贖惟寇盜者殺之其王椎髻戴金鈴衣

錦袍躡革履坐方牀官吏日謁三拜而退出入乘象或腰輿壯士五七百人執兵器以從國人見王皆坐俟其過乃起以王子三人爲副王官有落佶連四人共治國事如中國宰相無月奉隨時量給土產諸物次有文吏三百餘員目爲秀才掌文簿總計財貨又有卑官殆千員分主城池帑廩及軍卒其領兵者每半歲給金十兩勝兵三萬每半歲亦給金有差土俗婚聘無媒妁但納黃金於女家以娶之五月遊船十月遊山有山馬可乘跨或乘軟兜樂有橫笛鼓板亦能舞土人被髮其衣裝纏胷以下至於膝疾病不服藥但禱神求佛其俗有名

而無姓方言謂真珠爲沒爹蝦羅謂牙爲家囉謂香爲  
崑燉盧林謂犀爲低密先是宋元嘉十二年遣使朝貢  
後絕淳化三年十二月其王穆羅茶遣使陀湛使副蒲  
亞里判官李陔那假澄等來朝貢陔湛云中國有真主  
本國乃修朝貢之禮國王貢象牙真珠綉花銷金及綉  
絲絞雜色絲絞吉貝織雜色絞布檀香玳瑁檳榔盤犀  
裝劍金銀裝劍藤織花簞白鸚鵡七寶飾檀香亭子其  
使別貢玳瑁龍腦丁香藤織花簞先是朝貢使汎船舶  
六十日至明州定海縣掌市舶監察御史張肅先驛奏  
其使飾服之狀與嘗來入貢波斯相類譯者言云今主

舶大商毛旭者建溪人數往來本國因假其鄉導來朝  
貢又言其國王一號曰夏至馬囉夜王妃曰落肩娑婆  
利本國亦署置僚屬又其方言曰舶主爲勃荷王妻曰  
勃荷比尼贖其船中婦人名眉珠椎髻無首飾以蠻布  
纏身顏色青黑言語不能曉拜亦如男子膜拜一子項  
戴金連鎖子手有金鈎以帛帶縈之名阿嚕其國與三  
佛齊有讎怨互相攻戰本國山多猴不畏人呼以霄霄  
之聲卽出或投以果實則其大猴二先至土人謂之猴  
王猴夫人食畢羣猴食其餘使旣至上令有司優待久  
之使還賜金帛甚厚仍賜良馬戎具以從其請其使云

隣國名婆羅門有善法察人情人欲相危害者皆先知之大觀三年六月遣使入貢詔禮之如交阯又有摩逸國太平興國七年載寶貨至廣州海岸建炎三年以南郊恩制授闍婆國主懷遠軍節度琳州管內觀察處置等使金紫光祿大夫檢校司空使持節琳州諸軍事琳州刺史兼御史大夫上柱國闍婆國王食邑二千四百戶實封一千戶悉里地茶蘭固野可特授檢校司空加食邑實封紹興二年復加食邑五百戶實封二百戶南毗國在大海之西南由三佛齊風颿月餘可至其國王每巡行先期遣兵百餘人持水灑地上以防颶風揚

沙塵列鼎百以進食日一易之置翰林官供王飲食俗  
喜戰鬪習刀稍善射鑿雜白銀爲錢產眞珠番布其國  
最遠番舶罕到時羅巴智力干父子其種類也居泉之  
城南自是船舶多至其國矣

勃泥國在西南大海中去闍婆四十五日程去三佛齊  
四十日程去占城與摩逸各三十日程皆計順風爲則  
其國以版爲城城中居者萬餘人所統十四州其王所  
居屋覆以貝多葉民舍覆以草在王左右者爲大人王  
坐繩牀若出卽大布單坐其上衆舁之名曰阮囊戰鬪  
者則持刀被甲甲以銅鑄狀若大筒穿之於身護其腹



背其地無麥有麻稻又有羊及雞魚無蠶絲用吉貝花  
織成布飲椰子酒昏聘之資先以椰子酒檳榔次之指  
環又次之然後以吉貝布或量出金銀成其禮喪葬亦  
有棺歛以竹爲輦載棄山中二月始耕則祀之凡七年  
則不復祀矣以十二月七日爲歲節地熱多風雨國人  
宴會鳴鼓吹笛擊鉞歌舞爲樂無器並以竹編貝多葉  
爲器盛食食訖棄之其國鄰於底門國有藥樹取其根  
煎爲膏服之及塗其體兵刃所傷皆不死前代未嘗朝  
貢故史籍不載太平興國二年其王向打遣使施弩使  
副蒲亞里判官哥心等賫表貢大片龍腦一家底第二

等八家底第三等十一家底米龍腦二十家底蒼龍腦  
二十家底凡一家底並二十兩龍腦版五玳瑁殼一百  
檀香三椽象牙六株表云爲皇帝千萬歲壽望不責小  
國微薄之禮其表以數重小囊緘封之非中國紙類木  
皮而薄瑩滑色微綠長數尺濶寸餘橫卷之僅可盈握  
其字細小橫讀之以華言譯之云勃泥國王向打稽首  
拜皇帝萬歲萬歲萬歲願皇帝萬歲壽今遣使進貢  
向打聞有朝廷無路得到昨有商人蒲盧歇船泊水口  
差人迎到州言自中朝來比詣闍婆國遇猛風破其船  
不得去此時聞自中國來國人皆大喜卽造船船令蒲

盧歇導達入朝貢所遣使人只願平善見皇帝每年令人入朝貢每年修貢慮風吹至占城界望皇帝詔占城令有向打船到不要留臣本國別無異物乞皇帝勿怪其表文如是詔館其使於禮賓院優賜以遣之元豐五年二月其王錫理麻喏復遣使貢方物其使乞從泉州乘海舶歸國從之

注輦國東距海五里西至天竺千五百里南至羅蘭二千五百里北至頓田三千里自古不通中國水行至廣州約四十一萬一千四百里其國有城七重高七尺南北十二里東西七里每城相去百步凡四城用磚二城

用土最中城以木爲之皆植花果雜木其第一至第三  
皆民居環以小河第四城四侍郎居之第五城主之四  
子居之第六城爲佛寺百僧居之第七城卽主之所居  
室四百餘區所統有三十一部落其西十二曰只都尼  
施亞盧尼羅琶離鱉琶移布林琶布尼古檀布林蒲登  
故里娑輪岑本蹄揭蹄閻黎池離鄒部尼遮古林亞里  
者林其南八曰無雅加黎麻藍眉古黎苦低舍里尼密  
多羅摩伽藍蒲登蒙伽林伽藍琶里琶離遊亞林池蒙  
伽藍其北十二曰撥囉耶無沒离江林加里蒙伽藍漆  
結麻藍榭折蒙伽藍皮林伽藍浦稜和藍堡琶來田注

离盧婆囉迷蒙伽藍今國主相傳三世矣民有罪卽命  
侍郎一員處治之輕者繫於木格笞五十至一百重者  
卽斬或以象踐殺之其宴則國主與四侍郎膜拜于階  
遂共坐作樂歌舞不飲酒而食肉俗衣布亦有餅餌掌  
饌執事用婦人其嫁娶先用金銀指環使媒婦至女家  
後二日會男家親族約以土田生畜檳榔酒等稱其有  
無爲禮女家復以金銀指環越諾布及女所服錦衣遺  
婿若男欲離女則不取聘財女却男則倍償之其兵陣  
用象居前小牌次之梭槍次之長刀又次之弓矢在後  
四侍郎分領其衆國東南約二千五百里有悉蘭池國

或相侵伐地產真珠象牙珊瑚頗黎檳榔豆蔻吉貝布  
獸有山羊黃牛禽有山鷄鸚鵡果有餘甘藤羅千年棗  
椰子甘羅崑崙梅娑羅密等花有白末利散絲蛇臍佛  
桑麗秋青黃碧娑羅瑤蓮蟬紫水蕉之類五穀有綠豆  
黑豆麥稻地宜竹自昔未嘗朝貢大中祥符八年九月  
其國主羅茶羅乍遣進奉使侍郎娑里三文副使蒲恕  
判官翁勿防援官亞勒加等奉表來貢三文等以盤奉  
真珠碧玻璃升殿布於御坐前降殿再拜譯者導其言  
曰願以表遠人慕化之誠其國主表曰臣羅茶羅乍言  
昨遇舸船商人到本國告稱鉅宋之有天下也二帝

開基聖人繼統登封太岳禮祀汾陰至德升聞上穹眷  
命臣昌期斯遇吉語幸聞輒傾就日之誠仰露朝天之  
歎臣伏聞人君之御統也無遠不臻臣子之推誠也有  
道則服伏惟皇帝陛下功超邃古道建大中衣裳垂而  
德合乾坤劔戟鑄而範圍區宇神武不殺人文化成廓  
明明之德以臨御下民懷翼翼之心以昭事上帝至仁  
不傷於行葦大信爰及於淵魚故得天鑒孔彰帝文有  
赫顯今古未聞之事保家邦大定之基竊念臣微類醯  
鷄賤如芻狗世居夷落地遠華風虛荷燭幽曾無執贄  
今者竊聽歌頌普及遐陬恨年屬於桑榆阻躬陳於玉

帛矧滄溟之曠絕在跋涉以稍艱是敢傾倒赤心遙瞻  
丹闕任土作貢同螻蟻之慕膾委質事君比葵藿之向  
日謹遣專使等五十二人奉土物來貢凡真珠衫帽各  
一真珠二萬一千一百兩象牙六十株乳香六十斤三  
文等又獻珠六千六百兩香藥三千三百斤初羅茶羅  
乍旣聞商船言且曰十年來海無風濤古老傳云如此  
則中國有聖人故遣三文等入貢三文離本國舟行七  
十七晝夜歷耶勿丹山娑里西蘭山至占賓國又行六  
十一晝夜歷伊麻羅里山至古羅國國有古羅山因名  
焉又行七十一晝夜歷加八山占不牢山舟寶龍山至



三佛齊國又行十八晝夜度蠻山水口歷天竺山至賓頭狼山望東西王母塚距舟所將百里又行二十晝夜度羊山九星山至廣州之琵琶洲離本國凡千一百五十日至廣州焉詔閭門祇候史祐之館伴凡宴賜恩例同龜茲使其年承天節三文等請於啓聖禪院會僧以祝聖壽明年使回降詔羅茶羅乍賜物甚厚天禧四年又遣使琶欄得麻烈吒奉方物入貢至廣州病死守臣以其表聞詔廣州宴犒從者厚賜以遣之明道二年十月其王尸離囉茶印佗囉注囉遣使蒲押陀離等以泥金表進真珠衫帽及真珠一百五兩象牙百株西染院

副使閤門通使舍人符惟忠假鴻臚少卿押伴蒲押陀  
離自言數朝貢而海風破船不達願將上等珠就龍牀  
脚撒殿頂戴瞻禮以申嚮慕之心乃奉銀盤升殿跪撒  
珠於御榻下而退景祐元年二月以蒲押陀離爲金紫  
光祿大夫懷化將軍還本國熙寧十年國王地華加羅  
遣使奇囉囉副使南卑琶打判官麻圖華羅等二十七  
人來獻豌豆珠麻瑠璃大洗盤白梅花腦錦花犀牙乳  
香瓶香薷薇水金蓮花木香阿魏鵬砂丁香使副以真  
珠龍腦登陛跪而散之謂之撒殿旣降詔遣御藥室勞  
之以爲懷化將軍保順郎將各賜衣服器幣有差荅賜

其王錢八萬一千八百緡銀五萬二千兩

丹眉流國東至占臘五十程南至羅越水路十五程西至西天三十五程北至程良六十程東北至羅斛二十五程東南至闍婆四十五程西南至程若十五程西北至洛華二十五程東北至廣州一百三十五程其俗以版爲屋跣足衣布無紳帶以白紵纏其首貿易以金銀其主所居廣袤五里無城郭出則乘象車亦有小駟地出犀象鍤石紫草蘇木諸藥四時炎熱無雪霜未嘗至中國咸平四年國主多須機遣使打吉馬副使打臘判官皮泥等九人來貢木香千斤鍤鐵各百斤胡黃連三

十五斤紫草百斤紅氈一合花布四段蘇木萬斤象牙  
六十一株召見崇德殿賜以冠帶服物及還又賜多須  
機詔書以敦獎之

宋史卷四百八十九

宋史卷四百九十

元中書右丞相總裁脫脫等修

列傳第二百四十九

外國六

天竺 于闐 高昌 回鶻 大食

層檀 龜茲 沙州 拂菻

天竺二國舊名身毒亦曰摩伽陀復曰婆羅門俗宗浮圖道不飲酒食肉漢武帝遣使十餘輩間出西南指求身毒爲昆明所閉莫能通至漢明帝夢金人於是遣使天竺問佛道法由是其教傳於國中梁武帝後魏宣武皆

來貢獻隨煬帝志通西域諸國多有至者唯天竺不通  
唐貞觀以後朝貢相繼則天授天中五天竺王竝來朝  
獻乾元末河隴陷沒遂不復至周廣順三年西天竺僧  
薩滿多等十六族來貢名馬乾德三年滄州僧道圓自  
西域還得佛舍利一水晶器具葉梵經四十夾來獻道  
圓晉天福中詣西域在塗十二年住五印度凡六年五  
印度卽天竺也還經于闐與其使偕至太祖召問所歷  
風俗山川道理一一能記四年僧行勸等一百五十七  
人詣闕上言願至西域求佛書許之以其所歷甘沙伊  
肅等州焉耆龜茲于闐割祿等國又歷布路沙加濕彌

羅等國竝詔諭其國令人引導之開寶後天竺僧持梵  
夾來獻者不絕八年冬東印度王子穰結說囉來朝貢  
天竺之法國王死太子襲位餘子皆出家爲僧不復居  
本國有曼殊室利者乃其王子也隨中國僧至焉太祖  
令館於相國寺善持律爲都人之所傾嚮財施盈室衆  
僧頗嫉之以其不解唐言卽僞爲奏求還本國許之詔  
旣下曼殊室利始大驚恨衆僧諭以詔旨不得已遲留  
數月而後去自言詣南海附賈人船而歸終不知所適  
太平興國七年益州僧光遠至自天竺以其王沒徙曩  
表來上上令天竺僧施護譯云近聞支那國內有大明

王至聖至明威力自在每慙薄幸朝謁無由遙望支那  
起居聖躬萬福光遠來蒙賜金剛吉祥無畏坐釋迦聖  
像袈裟一事已披掛供養伏願支那皇帝福慧圓滿壽  
命延長常爲引導一切有情生死海中渡諸沉溺今以  
釋迦舍利附光遠上進又譯其國僧統表詞意亦與沒  
徙曩同施護者烏埧曩國人其國屬北印度西行十二  
日至乾陀羅國又西行二十日至曩誡囉賀囉國又西  
行十日至嵐婆國又西行十二日至誡惹曩國又西行  
至波斯國得西海自北印度行百二十日至中印度中  
印度西行三程至阿囉尾國又西行十二日至未曩囉



國又西行十二日至鉢賴野迦國又西行六十日至迦  
囉拏俱惹國又西行二十日至摩囉尾國又西行二十  
日至烏然泥國又西行二十五日至囉囉國又西行四  
十日至蘇囉茶國又西行十一日至西海自中印度行  
六月程至南印度又西行九十日至供迦拏國又西行  
一月至海自南印度南行六月程得南海皆施護之所  
述云八年僧法遇自天竺取經回至三佛齊遇天竺僧  
彌摩羅失黎語不多命附表願至中國譯經上優詔召  
之法遇後募緣製龍寶蓋袈裟將復往天竺表乞給所  
經諸國勅書遂賜三佛齊國王遐至葛古羅國主司馬

佶芒柯蘭國主讚坦羅西天王子謨馱仙書以遣之雍  
熙中衛州僧辭澣自西域還與胡僧密坦羅奉北印度  
王及金剛坐王那爛陀書來又有婆羅門僧永世與波  
斯外道阿里烟同至京師永世自云本國名利得國王  
姓牙羅五得名阿喏你縛衣黃衣戴金冠以七寶爲飾  
出乘象或肩輿以音樂螺鈸前導多遊佛寺博施貧乏  
其妃曰摩訶你衣大紬縷金紅衣歲一出多所振施人  
有寃抑候王及妃出遊卽迎隨伸訴署國相四人庶務  
竝委裁制五穀六畜果實與中國無異市易用銅錢有  
文漫圓徑如中國之制但實其中心不穿貫耳其國東

行經六月至大食國又二月至西州又三月至夏州阿  
里烟自云本國王號黑衣姓張名哩没用錦綵爲衣每  
遊獵三二日一還國署大臣九人治國事無錢貨以雜  
物貿易其國東行經六月至婆羅門至道二年八月有  
天竺僧隨舶至海岸持帝鐘鈴杵銅鈴各一佛像一軀  
貝葉梵書一夾與之語不能曉天聖二年九月西印度  
僧愛賢智信護等來獻梵經各賜紫方袍束帛五年二  
月僧法吉祥等五人以梵書來獻賜紫方袍景祐三年  
正月僧善稱等九人貢梵經佛骨及銅牙菩薩像賜以  
束帛

于闐國自漢至唐皆入貢中國安史之亂絕不復至晉  
天福中其王李聖天自稱唐之宗屬遣使來貢高祖命  
供奉官張鄴持節冊聖天爲大寶于闐國王建隆二年  
十二月聖天遣使貢圭一以玉爲柙玉枕一本國麾尼  
師貢琉璃瓶二胡錦一段其使言本國去京師九千九  
百里西南抵葱嶺與婆羅門接相去三千餘里東接吐  
蕃西北至疏勒二千餘里國城東有白玉河西有綠玉  
河次西有烏玉河源出崑岡山去國城西千三百里每  
歲秋國人取玉於河謂之撈玉土宜蒲萄人多醞以爲  
酒甚美俗事妖神乾德三年五月于闐僧善名善法來

朝賜紫衣其國宰相因善名等來致書樞密使李崇矩  
求通中國太祖令崇矩以書及器幣報之至是冬沙門  
道圓自西域還經于闐與其朝貢使至四年又遣其子  
德從來貢方物開寶二年遣使直末山來貢且言本國  
有玉一塊凡二百三十七斤願以上進乞遣使取之善  
名復至貢阿魏子賜號昭化大師因令還取玉又國王  
男總嘗貢玉櫛刀亦厚賜報之四年其國僧吉祥以其  
國王書來上自言破疏勒國得舞象一欲以爲貢詔許  
之大中祥符二年其國黑韓王遣回鶻羅廝溫等以方  
物來貢廝溫跪奏曰臣萬里來朝獲見天日願聖人萬

歲與遠人作主上詢以在路幾時去此幾里對曰涉道  
一年晝行暮息不知里數昔時道路嘗有剽掠今自瓜  
沙抵于闐道路清謐行旅如流願遣使安撫遠俗上曰  
路遠命使益以勞費爾國今降詔書汝卽齋往亦與命  
使無異也初太平興國中有澶州卒王貴者晝忽見使  
者至營急召貴偕行南至河橋驛馬已具卽命乘之俄  
覺騰虛而去頃之駐馬但見屋室宏麗使者引貴入見  
其主者容衛制度悉如王者謂貴曰俟汝年五十八當  
往于闐國北通聖山取一異寶以奉皇帝宜深志之遂  
復乘馬凌虛而旋軍中失貴已數日矣驗所乘卽營卒

之馬也知州宋煦劾貴以聞太宗釋之天禧初貴自陳年已五十八願遵前戒西至于闐尋許其行貴至秦州以道遠悔懼俄於市中遇一道士引貴出城登高原問貴所欲具以實對卽命貴閉目少頃令開視山川頓異道士曰此于闐國北境通聖山也復引貴觀一池池中有一仙童出一物授之謂曰持此奉皇帝又令瞑目俄頃復至秦州向之道士已失所在發其物乃玉印也文曰國王趙萬永寶州以獻天聖三年十二月遣使羅面于多副使金三監使安多都監趙多來朝貢玉鞍轡白玉帶胡錦獨峯橐駝乳香硃砂詔給還其直館于都亭西

驛別賜襲衣金帶銀器百兩衣著二百羅面于多金帶  
嘉祐八年八月遣使羅撒溫獻方物十一月以其國王  
爲特進歸忠保順砮鱗黑韓王羅撒溫言其王乞賜此  
號也于闐謂金翅烏爲砮鱗黑韓蓋可汗之訛也羅撒  
溫等以獻物賜直少不受及請所獻獨峯橐駝詔以遠  
人特別賜錢五千貫以橐駝還之而與其已賜之直其  
後數以方物來獻熙寧以來遠不踰一二歲近則歲再  
至所貢珠玉珊瑚翡翠象牙乳香木香虎珀花蕊布瑠  
砂龍鹽西錦玉鞦轡馬膃臑膾金星石水銀安息鷄舌  
香有所持無表章每賜以暈錦旋欄衣金帶器幣宰相



則盤毬雲錦夾欄地產乳香來輒羣負私與商賈牟利  
不售則歸諸外府得善價故其來益多元豐初始詔惟  
齎表及方物馬驢乃聽以詣闕乳香無用不許貢四年  
遣部領阿辛上表稱于闐國僂儼有福力量知文法黑  
汗王書與東方日出處大世界田地主漢家阿舅大官  
家大略云路遠傾心相向前三遣使入貢未回重複數  
百言董璫使導至熙州譯其辭以聞詔前三輩使人皆  
已朝見錫賚遣發賜勅書諭之神宗嘗問其使去國歲  
月所經何國及有無鈔略對曰去國四年道塗居其半  
歷黃頭回紇青唐惟懼契丹鈔略耳因使之圖上諸國

距漢境遠近爲書以授李憲八年九月遣使入貢使者  
爲神宗飯僧追福賜錢百萬還其所貢師子元祐中以  
其使至無時令熙河間歲一聽至闕八年請討夏國不  
許紹聖中其王阿忽都董娥密竭篤又言緬藥家作過  
別無報效已遣兵攻甘沙肅三州詔厚答其意知秦州  
游師雄言于闐大食拂菻等國貢奉般次踵至有司憚  
於貢賚抑留邊方限二歲一進外夷慕義萬里而至此  
非所以來遠人也從之自是訖于宣和朝享不絕

高昌國漢車師前王之地有高昌城取其地勢高敞人  
民昌盛以爲名焉後魏初沮渠無諱自署高昌太守無

諱死茹茹以闕伯周爲高昌王高昌有王始於此後魏  
至隋皆來貢獻唐貞觀中侯君集平其國以其地爲西  
州安史之亂其地陷沒乃復爲國語訛亦云高敞然其  
地頗有回鶻故亦謂之回鶻建隆三年四月西州回鶻  
阿都督等四十二人以方物來貢乾德三年十一月西  
州回鶻可汗遣僧法淵獻佛牙琉璃器琥珀蓋太平興  
國六年其王始稱西州外生師子王阿廝蘭漢遣都督  
麥索溫來獻五月太宗遣供奉官王延德殿前承旨白  
勛使高昌八年其使安鶻盧來貢雍熙元年四月王延  
德等還叙其水程來獻云初自夏州歷玉亭鎮次歷黃

羊平其地平而產黃羊渡沙磧無水行人皆載水凡二  
日至都囉囉族漢使過者遺以財貨謂之打當次歷茅  
女嗚子族族臨黃河以羊皮爲囊吹氣實之浮於水或  
以橐駝牽木楫而渡次歷茅女王子開道族行入六窠  
沙沙深三尺馬不能行行者皆乘橐駝不育五穀沙中  
生草名登相收之以食次歷樓子山無居人行沙磧中  
以日爲占旦則背日暮則向日日中則止夕行望月亦  
如之次歷臥梁劾特族地有都督山唐回鶻之地次歷  
大蟲太子族族接契丹界人衣尚錦繡器用金銀馬乳  
釀酒飲之亦醉次歷屋地因族蓋達于于越王子之子

次至達于于越王子族次歷拽利王子族有合羅川唐  
回鶻公主所居之地城基尚在有湯泉池次歷阿墩族  
經馬驥山望鄉嶺嶺上石龕有李陵題字處次歷格囉  
美源西方百川所會極望無際鷗鷺鳧鴈之類甚衆次  
至托邊城亦名李僕射城城中首領號通天王次歷小  
石州次歷伊州州將陳氏其先自唐開元二年領州凡  
數十世唐時詔勅尚在地有野蠶生苦參上可爲綿帛  
有羊尾大而不能走尾重者三斤小者一斤肉如熊白  
而甚美又有礪石剖之得賓鐵謂之喫鐵石又生胡桐  
樹經雨卽生胡桐律次歷益都次歷納職城城在大患

鬼魅磧之東南望玉門關甚近地無水草載糧以行凡  
三日至鬼谷口避風驛用本國法設祭出詔神禦風風  
乃息凡八日至澤田寺高昌聞使至遣人來迎次歷地  
名寶莊又歷六種乃至高昌高昌卽西州也其地南距  
于闐西南距大食波斯西距西天步路涉雪山葱嶺皆  
數千里地無雨雪而極熱每盛暑居人皆穿地爲穴以  
處飛鳥羣萃河濱或起飛卽爲日氣所爍墜而傷翼屋  
室覆以白堊雨及五寸卽廬舍多壞有水源出金嶺導  
之周圍國城以溉田園作水磴地產五穀惟無蕎麥貴  
人食馬餘食羊及鳧鴈樂多琵琶箏篪出貂鼠白氎繡

文花蓋布俗好騎射婦人戴油帽謂之蘇幕遮用開元  
七年歷以三月九日爲寒食餘二社冬至亦然以銀或  
鍤石爲筒貯水激以射或以水交潑爲戲謂之壓陽氣  
去病好游賞行者必抱樂器佛寺五十餘區皆唐朝所  
賜額寺中有大藏經唐韻玉篇經音等居民春月多羣  
聚遨樂於其間游者馬上持弓矢射諸物謂之禳災有  
勅書樓藏唐太宗明皇御札詔勅緘鎖甚謹復有摩尼  
寺波斯僧各持其法佛經所謂外道者也所統有南突  
厥北突厥大衆熨小衆熨樣磨割祿黠戛司末蠻格哆  
族預龍族之名甚衆國中無貧民絕食者共賑之人多

壽考率百餘歲絕無夭死時四月師子王避暑於北廷以其舅阿多于越守國先遣人致意於延德曰我王舅也使者拜我乎延德曰持朝命而來禮不當拜復問曰見王拜乎延德曰禮亦不當拜阿多于越復數日始相見然其禮頗恭師子王邀延德至其北廷歷交河州凡六日至金嶺口寶貨所出又兩日至漢冢砦又五日上金嶺過嶺卽多雨雪嶺上有龍堂刻石記云小雪山也嶺上有積雪行人皆服毛罽度嶺一日至比延憇高臺寺其王烹羊馬以具膳尤豐潔地多馬王及王后太子各養馬放牧平川中彌亘百餘里以毛色分別爲羣莫



知其數北廷川長廣數千里鷹鷂鷓鴣之所生多美草  
不生花砂鼠大如鸞鷲禽捕食之其王遣人來言擇日  
以見使者願無訝其淹久至七月見其王及王子侍者  
皆東向拜受賜旁有持磬者擊以節拜王聞磬聲乃拜  
旣而王之兒女親屬皆出羅拜以受賜遂張樂飲宴爲  
優戲至暮明日汎舟於池中池四面作鼓樂又明日游  
佛寺曰應運大寧之寺貞觀十四年造北廷北山中出  
碣砂山中嘗有烟氣涌起無雲霧至夕光燄若炬火照  
見禽鼠皆赤采者著木底鞵取之皮者卽焦下有穴生  
青泥出穴外卽變爲砂石土人取以治皮城中多樓臺

卉木人白晳端正性工巧善治金銀銅鐵爲器及攻玉  
善馬直絹一匹其駑馬充食纜直一丈貧者皆食肉西  
抵安西卽唐之西境七月令延德先還其國其王九月  
始至亦聞有契丹使來謂其王云高敞本漢土漢使來  
覘視封域將有異圖王當察之延德偵知其語因謂王  
曰契丹素不順中國今乃反間我欲殺之王固勸乃止  
自六年五月離京師七年四月至高昌所歷以詔賜諸  
國君長襲衣金帶繪帛八年春與其謝恩使凡百餘人  
復循舊路而還雍熙元年四月至京師景德元年又遣  
使金延福來貢

回鶻本匈奴之別裔在天德西北娑陵水上後魏號鐵勒唐初號特勒後稱回紇其君長曰可汗自貞觀以後朝貢不絕至德初出兵助國討平安史之亂故累朝恩禮最重然而恃功橫怒朝廷雖患其邀求無厭然頗姑息聽從之元和中訛爲回鶻會昌中其國衰亂其相馭職者擁外甥將龐勒西奔安西旣而回鶻爲幽州張仲武所破龐勒乃自稱可汗居甘沙西州無復昔時之盛矣歷梁後唐晉漢周皆遣使朝貢後唐同光中冊其國王仁美爲英義可汗仁美卒其弟仁裕立冊爲順化可汗晉天福中又改爲奉化可汗仁裕卒子景瓊立先是

唐朝繼以公主下嫁故回鶻世稱中朝爲舅中朝每賜  
答詔亦曰外甥五代之後皆因之建隆二年景瓊遣使  
朝獻三年阿都督等四十二人以方物來貢乾德二年  
遣使貢王百團琥珀四十斤犛牛尾貂鼠等三年遣使  
趙黨誓等四十七人以團玉琥珀紅白犛牛尾爲貢開  
寶中累遣使貢方物其宰相鞠仙越亦貢馬太平興國  
二年冬遣殿直張璨齎詔諭甘沙州回鶻可汗外甥賜  
以器幣招致名馬美玉以備車騎琮璜之用五年甘沙  
州回鶻可汗夜落紇密禮遏遣使裴溢的等四人以橐  
駝名馬珊瑚琥珀來獻雍熙元年四月西州回鶻與婆

羅門僧永世波斯外道阿里烟同入貢四年合羅川回  
鶻第四族首領遣使朝貢端拱二年九月回鶻都督石  
仁政麼囉王子邈拏王子越黜黃水州巡檢四族竝居  
賀蘭山下無所統屬諸部入貢多由其地麼囉王子自  
云向爲靈州馮暉阻絕由是不通貢奉今有內附意各  
以錦袍銀帶賜之咸平四年可汗王祿勝遣使曹萬通  
以玉勒名馬獨峯無峯橐駝賓鐵劔甲琉璃器來貢萬  
通自言任本國樞密使本國東至黃河西至雪山有亦  
郡數百甲馬甚精習願朝廷命使統領使得縛繼遷以  
獻因降詔祿勝曰賊遷凶悖人神所棄卿世濟忠烈義

篤舅甥繼上奏封備陳方略且欲大舉精甲就覆殘妖  
拓土西陲獻俘北闕可汗功業其可勝言嘉歡所深不  
忘朕意今更不遣使臣一切委卿統制特授萬通左神  
武軍大將軍優賜祿勝器服景德元年夜落紇遣使來  
貢四年又遣尼法仙等來朝獻馬仍許法仙遊五臺山  
又遣僧翟入奏來獻馬欲於京城建佛寺祝聖壽求賜  
名額不許大中祥符元年夏州萬子等軍主領族兵趨  
回鶻回鶻設伏要路示弱不與鬪俟其過奮起擊之勦  
戮殆盡其生擒者回鶻驅坐於野悉以所獲資糧示之  
曰爾輩狐鼠規求小利我則不然遂盡焚而殺之唯萬

子軍主挺身走鎮戎軍以聞上曰回鶻嘗殺繼遷世爲  
讎敵甘州使至亦言德明侵軼之狀意頗經視之量其  
兵勢德明未易敵也其年夜落紇寶物公主及沒孤公  
主娑溫宰相各遣使來貢東封禮成以可汗王進奉使  
姚進爲寧遠將軍寶物公主進奉曹進爲安化郎將賜  
以袍笏又賜夜落紇介胄三年又遣左溫宰相何居錄  
越樞密使翟符守榮等來貢是年龜茲圖王可汗遣使  
李廷福副使安副監使翟進來進香藥花蓋布名馬獨  
峯駝大尾羊玉鞍勒琥珀礪石等四年翟符守榮等三  
十人請從祀汾陰其年夜落紇遣使貢方物秦州回鶻

安密獻玉帶於道左禮成以翟符守榮爲左神武軍大將軍安殿民爲保順郎將餘皆賜冠帶器幣其年夜落紇遣使言敗趙德明立功首領請加恩賞詔給司戈司階郎將告勅十道使得承制補署六年龜茲進奉使李延慶等三十六人對於長春殿獻名馬弓箭鞍勒團玉香藥等優詔答之先是甘州數與夏州接戰夜落紇貢奉多爲夏州鈔奪及宗哥族感悅朝廷恩化乃遣人援送其使故頻年得至京師旣而唃廝羅欲娶可汗女而無聘財可汗不許因爲讎敵五年秦州遣指揮使楊知進譯者郭敏送進奉使至甘州會宗哥怨隙阻歸路遂



留知進等不敢遣八年敏方得還可汗王夜落隔上表  
言寶物公主疾死以西涼人蘇守信劫亂不時奏聞又  
謝恩賜寶鈿銀匣歷日及安撫詔書仍乞慰諭宗哥使  
開朝貢之路九年楊知進亦至遂遣郭敏賜宗哥詔書  
并甘州可汗器幣其年使來朝貢言夜落隔卒九宰相  
諸部落奉夜落隔歸化爲可汗王領國事天禧二年夜  
落隔歸化遣都督安信等來朝四年又遣使同龜茲國  
可汗王智海使來獻大尾羊初回鶻西奔族種散處故  
甘州有可汗王西州有克韓王新復州有黑韓王皆其  
後焉天聖元年五月甘州夜落隔通順遣使阿葛之王

文貴來貢方物六月詔甘州回紇外甥可汗王夜落隔  
通順特封歸忠保順可汗王二年五月遣使都督習信  
等十四人來貢馬及黃湖綿細白氈三年四月可汗王  
公主及宰相撒溫訛進馬乳香賜銀器金帶衣著暈錦  
旋襪有差五年八月遣使安萬東等一十四人來貢方  
物六年二月遣人貢方物熙寧元年入貢求買金字大  
般若經以墨本賜之六年復來補其首領五人爲軍主  
歲給綵二十疋神宗問其國種落生齒幾行曰三十餘  
萬壯可用者幾何曰二十萬明年勅李憲擇使聘阿里  
骨使諭回鶻令發兵深入夏境憲以命殿直皇甫旦旦

往不得前而妄奏功狀詔逮旦赴御史獄抵罪然回鶻使不常來宣和中間因入貢散而之陝西諸州公爲貿易至留久不歸朝廷慮其習知邊事且往來皆經夏國於播傳非便乃立法禁之

大食國本波斯之別種隋大業中波斯有桀黠者探穴得文石以爲瑞乃糾合其衆剽略資貨聚徒浸盛遂自立爲王據有波斯國之西境唐永徽以後屢來朝貢其王盆泥未換之前謂之白衣大食阿蒲羅拔之後謂之黑衣大食乾德四年僧行勤遊西域因賜其王書以招懷之開寶元年遣使來朝貢四年又貢方物以其使李

訶末爲懷化將軍特以金花五色綾紙寫官告以賜是年本國及占城門婆又致禮物于李煜煜不敢受遣使來上因詔自今勿以爲獻六年遣使來貢方物七年國王訶黎佛又遣使不囉海九年又遣使蒲希密皆以方物來貢太平興國二年遣使蒲思那副使摩訶末判官蒲囉等貢方物其從者目深體黑謂之崑崙奴詔賜其使襲衣器幣從者縑帛有差四年復有朝貢使至雍熙元年國人花茶來獻花錦越諾揀香白龍腦白沙糖薔薇水琉璃器淳化四年又遣其副酋長李亞勿來貢其國舶主蒲希密至海南以老病不能詣闕乃以方物附

亞勿來獻其表曰大食舶主臣蒲希密上言衆星垂象  
回拱於此辰百谷疏源委輸於東海屬有道之柔遠罄  
無外以宅心伏惟皇帝陛下德合二儀明齊七政仁宥  
萬國光被四夷賡歌洽擊壤之民重譯走奉珎之貢臣  
顧惟殊俗景慕中區早傾向日之心頗鬱朝天之願昨  
在本國曾得廣州蕃長寄書招諭令入京貢奉盛稱皇  
帝聖德布寬大之澤詔下廣南寵綏蕃商阜通遠物臣  
遂乘海舶爰率土毛涉歷龍王之宮瞻望天帝之境庶  
遵立化以慰宿心今則雖屆五羊之城猶賒雙鳳之闕  
自念衰老病不能興遐想金門心目俱斷今遇李亞勿

宋史卷四百九十一 列傳  
來貢謹備蕃錦藥物附以上獻臣希密凡進象牙五十  
株乳香千八百斤賓鐵七百斤紅絲吉貝一段五色雜  
花蕃錦四段白越諾二段都爹一琉璃瓶無名異一塊  
薔薇水百瓶詔賜希密勅書錦袍銀器束帛等以答之  
至道元年其國舶主蒲押陀黎齋蒲希密表來獻白龍  
腦一百兩膾肭臍五十對龍鹽一銀合銀藥二十小琉  
璃瓶白沙糖三琉璃甕千年棗舶上五味子各六琉璃  
瓶舶上褊桃一琉璃瓶薔薇水二十琉璃瓶乳香山子  
一坐蕃錦二段馳毛褥面三段白越諾三段引對於崇  
政殿譯者代奏云父蒲希密因緣射利泛舶至廣州迨

今五稔未歸母令臣遠來尋訪昉至廣州見之具言前  
歲蒙皇帝聖恩降勅書賜以法錦袍紫綾纏頭間塗金  
銀鳳瓶一對綾絹二十疋今令臣奉章來謝以方物致  
貢太宗因問其國對云與大秦國相鄰爲其統屬今本  
國所管之民纔及數千有都城介山海間又問其山澤  
所出對云惟犀象香藥問犀象以何法可取對云象用  
象媒誘至漸以大繩羈縻之耳犀則使人升大樹操弓  
矢伺其至射而殺之其小者不用弓矢可以捕獲上賜  
以襲衣冠帶被褥等物令閣門宴犒訖就館延留數月  
遣回降詔答賜蒲希密黃金準其所貢之直三年二月

又與賓同隴國使來朝咸平二年又遣判官文戌至三年  
船主陁婆離遣使穆吉鼻來貢吉鼻還賜陁婆離詔  
書并器服鞍馬六年又遣使婆羅欽三摩尼等來貢方  
物摩尼等對於崇政殿持真珠以進自云離國日誠願  
得瞻威顏卽獻此乞不給回賜真宗不欲違其意俟其  
還優加恩賚景德元年又遣使來時與三佛齊蒲端國  
使竝在京師會上元觀燈皆賜錢縱其宴飲其秋蕃客  
蒲加心至四年又遣使同占城使來優加館餼之禮許  
徧至苑囿寺觀遊覽大中祥符元年十月車駕東封船  
主陁婆離上言願執方物赴泰山從之又船主李亞勿



遣使麻勿來獻玉圭竝優賜器幣袍帶并賜國主銀飭  
繩床水罐器械旗幟鞍勒馬等四年祀汾陰又遣歸德  
將軍隋羅離進馘香象牙琥珀無名異繡絲紅絲碧黃  
綿細越諾紅駝毛間金線璧衣碧白琉璃酒器薔薇水  
千年棗等詔令陪位禮成竝賜冠帶服物五年廣州言  
大食國人無西忽盧華百三十歲耳有重輪貌甚偉異  
自言遠慕皇化附古邏國舶船而來詔就賜錦袍銀帶  
加束帛天禧三年遣使蒲麻勿陁婆離副使蒲加心等  
來貢先是其入貢路繇沙州涉夏國抵秦州乾興初趙  
德明請道其國中不許至天聖元年來貢恐爲西人鈔

略乃詔自今取海路繇廣州至京師至和嘉祐間四貢  
方物最後以其首領蒲沙乙爲武寧司階熙寧中其使  
辛押陀羅乞統察蕃長司公事詔廣州裁度又進錢銀  
助脩廣州城不許六年都蕃首保順郎將蒲陀婆離慈  
表令男麻勿奉貢物乞以自代而求爲將軍詔但授麻  
勿郎將其國部屬各異名故有勿巡有陀婆離有俞盧  
和地有麻囉跋等國然皆冠以大食勿巡所貢又有龍  
腦兜羅錦述錦襪蕃花簞陀婆有金飾壽帶連環臂鈎  
數珠之屬政和中橫州士曹蔡蒙休押伴其使入都沿  
道故滯留疆市其香藥不償直事聞詔提點刑獄置獄

推治因詔自今蕃夷入貢竝選承務郎以上清幹官押  
伴按程而行無故不得過一日乞取賈市者論以自盜  
云其國在泉州西北舟行四十餘日至藍里次年乘風  
颿又六十餘日始達其國地雄壯廣柔民俗侈麗甲於  
諸蕃天氣多寒其王錦衣玉帶躡金履朔望冠百寶純  
金冠其居以碼礪爲柱綠甘爲壁水晶爲瓦碌石爲磚  
活石爲灰帷幕用百花錦官有丞相太尉各領兵馬二  
萬餘人馬高七尺士卒驍勇民居屋宇略與中國同市  
肆多金銀綾錦工匠技術咸精其能建炎三年遣使奉  
寶玉珠貝入貢帝謂侍臣曰大觀宣和間茶馬之政廢

故武備不脩致金人亂華危亡不絕如綫今復捐數十萬緡以易無用之珠玉曷若惜財以養戰士詔張浚却之優賜以答遠人之意紹興元年復遣使貢文犀象齒朝廷亦厚加賜與而不貪其利故遠人懷之而貢賦不絕

層檀國在南海傍城距海二十里熙寧四年始入貢海道使風行百六十日經勿巡古林三佛齊國乃至廣州其王名亞美羅亞眉蘭傳國五百年十世矣人語音如大食地春冬暖貴人以越布纏頭服花錦白氎布出入乘象馬有奉祿其法輕罪杖重罪死穀有稻粟麥食有

魚畜有綿羊山羊沙牛水牛橐駝馬犀象藥有木香血  
竭沒藥鵬砂阿魏薰陸產真珠玻璃密沙華三酒交易  
用錢官自鑄三分其齊金銅相半而銀居一分禁民私  
鑄元豐六年使保順郎將層伽尼再至神宗念其絕遠  
詔頒賚如故事仍加賜白金二千兩

龜茲本回鶻別種其國主自稱師子王衣黃衣寶冠與  
宰相九人同治國事國城有市井而無錢貨以花蒞布  
博易有米麥瓜果西至大食國行六十日東至夏州九  
十日或稱西州回鶻或稱西州龜茲又稱龜茲回鶻自  
天聖至景祐四年入貢者五最後賜以佛經一藏熙寧

四年使李延慶曹福入貢五年又使盧大明篤都入貢  
紹聖三年使大首領阿連撒羅等三人以表章及玉佛  
至洮西熙河經略使以其罕通使請令於熙秦州博買  
而估所齎物價答賜遣還從之

沙州本漢燉煌故地唐天寶末陷于西戎大中五年張  
義潮以州歸順詔建沙州爲歸義軍以義潮爲節度使  
領河沙甘肅伊西等州觀察營田處置使義潮入朝以  
從子惟深領州事至朱梁時張氏之後絕州人推長史  
曹義金爲帥義金卒子元忠嗣周顯德二年來貢授本  
軍節度檢校太尉同中書門下平章事鑄印賜之建隆

三年加兼中書令子延恭爲瓜州防禦使興國五年元忠卒子延祿遣人來貢贈元忠燉煌郡王授延祿本軍節度弟延晟爲瓜州刺史延瑞爲衙內都虞候咸平四年封延祿爲譙郡王五年延祿延瑞爲從子宗壽所害宗壽權知留後而以其弟宗允權知瓜州表求旌節乃授宗壽節度使宗允檢校尚書左僕射知瓜州宗壽子賢順爲衙內都指揮使大中祥符末宗壽卒授賢順本軍節度弟延惠爲檢校刑部尚書知瓜州賢順表乞金字藏經洎茶藥金箔詔賜之至天聖初遣使來謝貢乳香碇砂玉團白景祐至皇祐中凡七貢方物

拂菻國東南至滅力沙北至海皆四十程西至海三十  
程東自西大食及于闐回紇青唐乃抵中國歷代未嘗  
朝貢元豐四年十月其王滅力伊靈改撒始遣大首領  
你厮都令厮孟判來獻鞍馬刀劔真珠言其國地甚寒  
土屋無瓦產金銀珠西錦牛羊馬獨峯駝梨杏千年棗  
巴欖粟麥以蒲萄釀酒樂有箜篌壺琴小篳篥偏鼓王  
服紅黃衣以金線織絲布纏頭歲三月則詣佛寺坐紅  
床使人舁之貴臣如王之服或青綠緋白粉紅黃紫竝  
纏頭跨馬城市田野皆有首領主之每歲惟夏秋兩得  
奉給金錢錦縠帛以治事大小爲差刑罰罪輕者杖數



十重者至二百大罪則盛以毛囊投諸海不尚鬪戰鄰國小有爭但以文字來往相詰問事大亦出兵鑄金銀爲錢無穿孔面鑿彌勒佛背爲王名禁民私造元祐六年其使兩至詔別賜其玉帛二百匹白金瓶襲衣金束帶

宋史卷四百九十